

## ***ASO LULU, 10 FEPUARI 2021***

*Na nofoia e le Fofoga Fetalai le Nofoa i le itula e 9:18 i le taeao.*

Tatalo.

**FOFOGA FETALAI:** Ou te faasilasila atu ua toe amatalia Tualumaga ma Galuega a le Fono Aoao Faitulafono.

### **ISI FAASILASILAGA A LE FOFOGA FETALAI**

**FOFOGA FETALAI:** E fia faamanatu atu i le mamalu o le Palemene le Tulafono Tumau 24 o lo o aiaia ai lou auai i le Fono a le Palemene faapea ma lou le auai. O lo o amata mai le (1) e oo i le (4) aiaiga ma tuutuuga. Afai ae le usitaia e le sui usufono, o le a mafai e le Fofoga Fetalai ona faaoga aulape o le Tulafono Tumau.

Ia, o ia lava faasilasilaga ua faapena ona faamanatu i le tatou Palemene ina ia tatou mulimulitaia aua le tapuaiga a Samoa o lo o latou faafofoga mai a o atoa i tagi ma tatou siimea faatasi, aua le soalaupuleina o le manuia o le atunuu e ala i upufai o Malo. Ia, o le agaga foi lea na filifili ai tatou ina ia faapena ona tatou galulue faatasi e saili manuia e faatino ai le finagalo o le Atua, aua tatou te galulue ma tapena ae faalagolago i le Atua na te faataunuuina.

### **TULAFONO TAU FAAOFI O LE FAATATAUINA O TUPE FAAOPOPO (NU.1) 2020/2021 – felafolafoaiga faaauau i luga o le faitauga faalua – Aso 16**

**FOFOGA FETALAI:** E tolopo Galuega a le Fono Aoao i le aso Fono ananafi o lo o saunoa le sui usufono mo le itumalo faaalaalafaga o Palauli Sisifo.

Ae ou te le i tapa le sui usufono e tulai mai e faaauau le saunoaga, ia, ou te tapa lau Afioga i le Palemia. Ma le faaaloalo lava.

**Susuga Hon TUILAEP AUELUA FATIALOFA LUPESOLIAI LOLOFIETELE NEIOTI AIONO GALUMALEMANA Dr. SAILELE MALIELEGAOI (Palemia):**

Lau Afioga i le Fofoga Fetalai, e faatalofa atu foi i leni taeao fou i le maleifua mai ma alafai mai o le mamalu o le Maota i leni taeao i le alofa matalasi o le tatou Matai, aemaise le faafogafoga mai foi a le mamalu o lo tatou atunuu o taputapu mai le Fonotaga o le Fonousu leni a Samoa o lo o auai mai uma le mamalu o sui usufono e tatau ona faapea, o paia lava ia tauave, o paia faalupelupe o Samoa i ona tulaga faalupea. E auai faatasi foi ma lau Afioga i le momoliina o le agaga o le faafetai i le Atua Silisili Ese o le lagi ma le lalolagi, o le Atua malo o lo o faavae ai lo tatou Malo, ae a le tului mai o le malamalama ma le musumusuina o a outou Afioga. Ou te manatua ai le poloaiga na ave i le Taitai o Isaraelu o Mose, alu ina taitai mai lou nuu, tali Mose, e faapefea ona ou alu ou te le iloa fai se upu i luma o tagata? Ona fetalai lea o le Atua, “Ou te le i faia ea le tauaso, ou te le i faia ea le gugu, ou te le i faia ea le logonoa? Sau ina alu, ou te avatu upu i lou gutu e te tautala ai ma le poto i lou nuu.”

Lau Afioga i le Fofoga Fetalai, o tatou uma lava nei, tatou te omai i totonu o le Palemene o tatou o tagata e vaivai, ae lagona le malosi i le pai mai o le agaga o le Atua ia i tatou. O isi Afioga taua ia e taiala mo i tatou, afai e tatou te afaatasi ma le Atua, o ai se faasagatau mai?

Lau Afioga i le Fofoga Fetalai, o lou tulai atu i le taeao leni, o lou faafetaia o le 37 sui usufono ua maleifua mai e faaauau ai le tatou Fonotaga, o le Fonotaga e le mafai ona usua pe a le auai mai le 26, ia i luga atu o le afa. E 50 le aofai o sui usufono o le Palemene, o Nofoa ia o le Palemene, ae a le ato le afa, e tatau ona sili atu i le afa, e le mafai ona usu. Aisea? E le mafai ma e le tatau ona usua se Fono, ma tatou taunuu ai i ni iuga taua e faafoe ai le atunuu leni ae le o ato le numera, ma e le o lava foi sui usufono e tatau ona latou fai sao i tonufai a lo tatou Malo o Samoa la e tapuai mai. Lau Afioga i le Fofoga Fetalai, o le agaga lena. E tofua uma lava tatou ma o tatou tuatuagia, tuatuagia faale-aiga, tuatuagia faatatau i lo tatou valaauina, aemaise tuatuagia faale-itumalo. Ua taoto uma mea ia lau Afioga i le Fofoga Fetalai, ona o le valaau a le Atua na valaauina ai tatou. Omai ina o. O upu e masani ai le atunuu, o oe o le sui usufono o le itumalo e te auai i faalagamae a le atunuu i le malae po o le Maota i Tiafau e saili ai malo. E te sau la e te le faatemeteme e fai le tautoga. Tautoga ia te ai? Tautoga i le Atua o lo o faavae ai le atunuu leni, ma o lau tautoga foi lea i lou itumalo, i taitai o lou itumalo na filifilia oe, o le a to lou matupalapala e te sau e te alu, fai oe ma sui, o lau amio, o lau tautala, ia fua faatatau i le tapuaiga a Samoa aemaise lava le nofo tatalo a Samoa, o feagaiga taulagi a nuu ia manuia o tatou faiva. Aisea? Leaga o tatou o auauna a le Atua. E manino Afioga a Iesu, na totolo lava i lalo e mulumulu vae, e tau mai ai ia i tatou, a e fia taitai, totolo i lalo, auauna, galue. A e fia muamua, mulimuli. O le feau taua lava lena mo i tatou uma, ia galue ma fua uma mea i le faamasinoga tonu o lea e musumusuina

ai oe, aua ne i aveane ni mea tau oe e faamuamua, faamuamua i lo lou tiute na tofia ai oe. A o le a le mea lea ua tupu? Ua ulagia le Palemene lenei, ulagia ma a tatou tautoga na fai. O lea lava na tatou vaai i totonu i i, ua oo lava i le tautoga na fai i le Maota lenei, ua pelogia le Maota atoa a o la e faafogafoga mai Samoa i le suafa o le isi, nofo lava ia ma fai lona suafa fou e le ogatasi ma le suafa o lea e faamau ai le igoa matai, a o lea e faafogafoga Samoa. O le tautoga i le Atua, se vaai i le le toe'e, o le tautoga i luma o le Silisili Ese, o le tautoga a tatou e fai i luma o le Ao o le Malo, e tuu atu ai o tatou tagata tatou te auauna ma le loto mauualalo, tatou galulue. E le aumaia ni ou mamalu e faatino ai lau galuega. A o le a le mea lea ua tupu? Ua tiai le Fono. O la e feoai i Savaii le toa-fa lea, a ua leva ona i totonu o le Maota lenei. Afai ua lauiloa i le olegia o le atunuu i totonu o le tautoga, o lea foi ua olegia le Maota lenei i le aumai o ni faanoi fai mai o la e mamai ae o i o faasau o latou ata i a latou faatosina la e fai ananafi i Savaii. E aliali mai ai i ina le le fufu'a, amioga le fufu'a ma le le migao.

Lau Afioga i le Fofoga Fetalai, o le Contempt of Parliament, the Supremacy of Parliament, the Dignity of Parliament, le mamalu atoa o le Maota lenei, the dignity of Samoa, the dignity of the Head of State na faatautoina, lea ua faasiliaupule, ua ulagia. A o le mea sili ona matuia o le faasau i le nusipepa i le taeao nei ma pei e fetuu mai i le taitaiga o le Palemene lenei, fetuu mai i le soona fai o nei Fono ae taofia ai latou. Ia o ai o ona taofia latou o lea e saoloto uma tatou i le taimi e tatai ai ona faatoa tatou o loa lea? E faapea e popoto latou ae valea le Palemene lenei? O le faaaloalo o le Palemene lenei i a latou tautoga na fai ma le usitaia ma le faamamalu i a tatou tautoga o le Atua Silisili ese lea e fai i ai, e le ulagia le Atua, ma e le sau faatagata le malaia o le sui usufono na te faia le mea lea. A o se isi foi a o se isi? Ia o sui matutua o le Maota, sa lelei le amio i i a o la e ua faapea o le a? A o le o faatasi ai lava i le mea lea o le aumai o se faanoi pepelo o la e gasegase? Lau Afioga i le Fofoga Fetalai, ae o faali mai a latou faatosina o lo o fai. E faapena foi tatou, tatou te fia talanoa foi i o tatou itumalo, a o lea e olo lava le fua ona o tatou tiute na tatou tauto ai.

Lau Afioga i le Fofoga Fetalai, ou te faamalo atu i lau Afioga ma le taitaiga o le Maota, a o le mea lea o le Contemp of Parliament, e le mama ia te au o le Taitai o le Maota lenei. O le mea sili o lea e faafogafoga mai Samoa. O ni taitai nei tou te moomia? O ni taitai nei tou te moomia? O ni taitai a manao lava latou i le mea e fai o fai ma omai pepelo le Palemene, olegia le Maota nei, olegia ma ulagia Tulafono Tumau, olegia le Atua i tautoga na fai nei, olegia le Ao o le Malo? Lau Afioga, o ni taitai la ia e taitaia le atunuu, o ni taitai ia e taitaia le atunuu?

Lau Afioga i le Fofoga Fetalai, ia o le talanoa atu lea. Ua ou le iloa po ua faafia ona ou tulai atu ma faamanatu i sui usufono o le Maota, ua leva ona fia tali le Kapeneta ae o lo o tuu avanoa pea le Kapeneta. O le toe Fono lenei, o le toe Fono lenei e ave ai le tatou faafetai ia i latou e tatai ona ave i ai le

faafetai. O i latou e pulea tatou, na tofia tatou, na auala mai ia i latou le finagalo o le Atua.

Lau Afioga i le Fofoga Fetalai, ou te faamalulu atu ua tele lou taimi, a o upu lava, ua tele taimi ua ou talanoa atu a, a o upu e tatau ona fai, e tatau ona fai.

Lau Afioga i le Fofoga Fetalai, o lau faaiuga lena e toe faaiu atu i lou faafetaia o sui usufono o le Palemene o lo o nofoia o latou nofoa ma le taumafai mai, ua taatia uma o latou tuatuagia faale-aiga, o latou tuatuagia faale-faipule, a ua tatou auai i i, leaga o i i le Fonousu a le Palemene, o le faatumutumuga lea, o le palealii lea o tatou tofiga. A e le saofai i totonu o le Maota lenei ma fai le sao o lou itumalo, e leai se aoga na faipule ai.

Lau Afioga i le Fofoga Fetalai, ia, ua iu foi ma se talanoa atu, ona e le fologofie se i tulou faasilasilaga ia e faasau nei, e tauemua ai, e ulagia ai le Fonotaga a le Palemene, le Fonousu a Samoa o lo o faagasolo nei.

**FOFOGA FETALAI:** Malo faafetai. Ia, ua manino ma malamalama le saunoaga a le Taitai o le Malo, o le lagona e matimati ai le tatou Fonotaga a le Palemene, aua e ui lava ona o le toe Fonotaga lenei a le Palemene i lenei foi Paeaiga, ae aoga, e aoga mo sui usufono mamalu o le Palemene. E le gata i lenei Palemene ae faapea foi se isi Palemene e tulai mai, aua e le faapea o lo outou mamalu ma i tatou uma ua faapena ona tatou mautinoa lo tatou toe valaauina. O le mea lena, o le mea a le Atua. Aua tatou te galulue, a o le Atua lava na te toe valaauina i tatou ma toe filifilia i tatou mo le isi foi Paeaiga.

Ae o le tulaga tonu lea pei ona saunoa i ai le Afioga i le Palemia, ia o le tatou tautoga muamua lava e faapena, o le tautoga o le loto faamaoni ina ia e tauaveina ou tiute ma faatino ou tiute ma le faamaoni. Ia e pei o le tulaga lena, ae aliali mai tatou te le manatu mamafa i ai. O le popolega lena ina ia aua ne i o tatou naunau e aveia i tatou ma taitai ae tatou te le tausisia le faamaoni, o le faamaoni e faatino ai o tatou tiute ina ia tatou auai i a tatou Fonotaga i le Palemene.

Ia, sa tupu muamua le mea lea, sa i ai le taimi na tupu ai le mea lea. Na ona ou faamanatu atu, sa faamalolo ai se tasi o sui usufono ona o le le auai i a tatou Fonotaga, le auai i aso Fono sosoo e 3. Sa faamalolo e le Palemene. Ua leva ona ou fia... a na ou faaaogaina le Tulafono Tumau lea e le iloa pe ua toafia e faamalolo. Ae ui i lea, e faapena se lagona, e fai foi o le manatu i a tatou Tulafono Tumau, a o le faitau i si a tatou aganuu, le tatou agaifanua ma le tatou aga faaaloalo. Ae pei e faapena, o le ala foi lea e mafua ai ona matimati. Ae saolele lava le saunoaga a lau Afioga, leaga o lau Afioga e le gata o le Taitai o le Malo, a o le Taitai foi o le Maota.

O le mea la lea, e faamalulu atu foi i lau Afioga i le Palemia, afai foi ua le faaaogaina e le Fofoga Fetalai a tatou Tulafono Tumau i tulaga o ona aulape, ia pei o itu lena o lea foi e popole ma alofa i ai le taofi. Ia o la e silasila mai

le Atua i le sui usufono ma lona faamaoni. Ioe. A e faamaoni i mea iti, leaga e le o se upu a se isi o le upu a le Tusi Paia. A e faamaoni i mea iti e tofia oe e te pule i mea e tele. O a mea e tele? Avea oe ma Taitai o le atunuu. Ia, pei o le tulaga lena, ia o le a faapefea ona avea oe ma Taitai o le atunuu e te le faamaoni? O itu ia, na ona ou faamalulu atu foi i lau Afioga, ona e i ai foi le talitonuga ne i safea i lou finagalo lou le faaaogaina o aulape o le Tulafono Tumau, a o itu na. E fesili lava le ausoo ia Iesu, o fea o nei Tulafono e 10 e taai ai se...? Ae tali lo tatou Alii Faaola, “O le alofa”. O le alofa la lea e faatino ai le tatou galuega.

Ia a o faafofoga mai Samoa, e faapena le taitaiga o le tatou Fonotaga. O Tulafono uma lava, e faavae i le alofa ma le tatou avafatafata. O le mea la lea, atonu ua maua foi se finagalo o le tatou sui usufono mo Palauli i Sisifo. O lea ua tea lea vaega, ae o le a faagasolo le tatou galuega.

Ou te tapa ma le faaaloalo lau Afioga i le sui usufono e te tulai mai e faaii mai lau saunoaga, ua atoa lava lou itula ananafi. Ae faaii maia lau saunoaga i lenei taimi pe a ua e tapena. Ia, tulai mai lau Afioga i le sui usufono mamalu.

**Afioga AFOA AMITUANAI FALEULU MAULI (Palauli Sisifo):** Faafetai i lau Afioga i le Fofoga Fetalai. Ou te fia piiama foi i le faafetai i le Atua i lenei taeao i Lona alofa ma Lona agalelei i le mamalu o le Fonousu aemaise le paia o le tapuaiga a Samoa.

Ou te faatalofa atu i le Fofoga Fetalai, ou te faatalofa atu foi i lau Afioga i le Palemia ma le Kapeneta aemaise Minisita Lagolago. E faatalofa atu foi i le mamalu o Ofisa Sili o Pulega ma le mamalu o le aufaigaluega a le Malo, aemaise le Failautusi ma le Ofisa o le Fono.

Ia, o le a toe faaauau le lauga a Palauli Sisifo, lou itumalo malosi. Faafetai i lau Afioga i le Minisita ma le Matagaluega o Tupe mo le galuega maeaea, ma e matua lagolagoina e lenei itumalo lenei Tala o le Tupe 2020/2021 ma le agaga faafetai. Malo lava galulue.

O le agaga lava lea e tasi lau Afioga i le Fofoga Fetalai, e pei ona ou faailo i le aso ananafi, na toe fulisia lava si ou itumalo e toe lagolagoina Tulafono e 3 sa faatoa pasia atu nei, aemaise lava le Tulafono taua ua toe faatulaga ai le Faamasinoga o Fanua ma Suafa, aemaise ina ua malamalama si ou itumalo. E ui lava ua tutoatasi le Faamasinoga o Fanua ma Suafa, ae tasi lava le Faamasinoga i le faatulagaina ai o le Tafatolu Fefaatauagai o le Malo o Samoa. Faafetai i le Afioga i le Palemia ma le Kapeneta aemaise o le Afioga i le Minisita e ona nei Tulafono. O le mea mautinoa, ua maua le mapusaga o nai o tatou tagata. Faafetai lava.

E 3 nai mataupu lau Afioga ou te fia oo i ai i le Tala o le Tupe. Muamua, o le tulaga lava lea i fagu malosi e pei o le Olioli, Rover ma le Boom Vodka ma isi fagu ia ua maua gofie, aemaise lava i nai fanau. E tatalo atu se i silasila ifo pea i le tuualalo a lenei itumalo, ona o lo o afaina ai soifua o le atunuu,

aemaise lava i fagu ia e fausia mai i le araisa. Ou te molimau atu i le matautia o tatou home brew ia sa gaosia mai le araisa i vaitau foi ia o tatou laiti, e matua black out lava ma faavalevalea ai tagata, ma sa faasaina ina ua toe tatalaina le tatou falepia o le Vailima Brewery [.....]. E tuu atu pea i tafatafa o le Minisita o Ava Malosi ma Tiute lea mataupu.

O le mataupu lona lua, o le mataupu e faaauau pea ona fai i ai se leo o lenei itumalo, i le tulaga lava lea o le TV Bingo, e tou te talie pe a ou talanoa i ai, ae o le tatalo a lenei itumalo, se i alofa le Minisita, se i silasila ane i le Tulafono. O le alofa lava i nai fanau e mafua ai ona fai pea se lagona o lenei itumalo, ma e le uma pea lou lauga i ai. Ou te tu mai foi i le isi tatou Paeaiga fou, ou te toe lauga foi i ai. Ia, taatia atu la i lau Afioga i le Minisita...

**FOFOGA FETALAI:** Malie le sui usufono se i tulai mai le Minisita mo Pisinisi, Alamanuia ma Leipa.

**Afioga Hon Lautafi Fio Selafi Purcell (Minisita mo Pisinisi, Alamanuia ma Leipa):** Lau Afioga i le Fofoga Fetalai, ia, faafetai ua toe faaauau le lauga a Palauli Sisifo. Sa ou faapea ua sui le tausaga ua sui le pese e pese mai ai le sui usufono. A o lea ou te faalogologo atu o la e pese mai lava i le pese o le tausaga lea na tea. O le manatu lava lea o le sui usufono ia i le TV Bingo, e ese foi le manatu o le Malo, ona e tilotilo i le penefiti tele atu. O le mea lea e mafaufau i ai le sui usufono, e tatau ona faasa mea ia i totonu o fale o aiga. O lea ua tuu lava i lalo i le faaitiitia lava taimi, tuu tapulaa taimi e tuai ina ia fai atu ua momoe tamaiti aoga, ua tatau ona momoe tamaiti aoga. A o le tiute lea o le tama ma le tina i totonu o aiga, ave tamaiti e faamomoe, e ta ea le 10 faatoa sau le TV Bingo. O mea lava la ia, e le mafai ona enforce tatou ni mea faapena, e sa ona fai i totonu o fale o tagata ia, lea e tuu i ai taaloga ia e taaalo ai.

O le tilotilo foi a le Malo i penefiti o faamanuiaga e maua mai, e le gata ia i latou ia e taaalo ma maua ai le fiafiaga i mea e fai i totonu o latou aiga i afiafi, ae i ai foi isi faamanuiaga e maua mai i laisene o taaloga nei, lea e faasafua atu e faamanuia ai tatou au taaalo. Ia, o pili o tamaiti aoga, i latou e le gafatia ona totogi pili, ia o lea e maua mai i i le fesoasoani i le Matagaluega lea e ala mai la i mea ia. E tilotilo lautele atu le Malo i lo le tilotilo i mea ia e taumafai mai ai le sui usufono faapea o le a leaga ai le tupulaga ma tulaga faapena. E mafai lava ona fai ae i ai lava le mea e gata ai ona tuu loa lea i le loto faitalia o le matua ia, i mea e fai i totonu o lona fale. A o lea ua tuu atu i ai puipuiga ina ia aua ne i aafia ai fanau laiti, e pei o le mea lea e fai mai ai le sui usufono.

Lau Afioga, ou te le iloa po o le a le isi faamatalaga e toe fai atu i le sui usufono ae o lea e taumafai le Malo ia puipuia uma tulaga ia e taumafai mai ai. Ma lou faaaloalo.

**FOFOGA FETALAI:** Malo faafetai. Ia, o lea ua saunoa atu le Minisita o Leipa, malie le sui usufono, o lou lava lena finagalo, e le taofia ai le tulaga o le silasila a le Malo i le lautele. O itu lelei.

Se i tulai mai lava le sui usufono mo Faleata Sasae lau fetalaiga Salausa.

**Afioga Salausa John Ah Ching (Faleata Sasae):** Faafetai i lau Afioga mo le avanoa. O sina mea foi e fia faamalamalama atili, manaia le mataupu ua lauga i ai le sui usufono, ae i ai foi le isi, aua o lea e naunau le sui usufono mo le saogalemu o fanau. O lea foi ua saunoa atu le Afioga i le Minisita i le taimi lea ua fai ai le tatou bingo, o lea ua tuu lava se i faatuatuai se i oo ina momoe tamaiti aoga. E i ai isi tulaga faale-soifua maloloina e aafia ai tupulaga, aemaise lava tupulaga teine i taimi a o fai bingo ia e o ai tina ma ave a latou fanau i le fale bingo. E pei o le isi lea itu faaletonu sa tele ina tupu mai ai maitaga le fuafuaina i a tatou fanau teine. E pei o le isi la lena mea, e manaia pe a faapea foi o lea e fai tonu o lea ua nonofo i le fale ma fai ai le bingo, ua le o ai la tina ma ave a latou fanau teine i bingo ia e masani ona fai i afiafi. Aua e alu atu le tina bingo, ae taaalo lava tamaiti i autafa, taaalo i fafo. A o mea ia lea ua matauina, sa tutupu ai faalavelave ia tatou fanau teine laiti, ona o tulaga le maalofia e faatino e faatino e tagata matutua i fanau teine laiti ia. O le isi lena vaega lau Afioga i le Fofoga Fetalai, e ao foi ona manatu i ai i le tulaga lea.

**Afioga Sulamanaia Fetaiai Tauilili Tuivasa (Vaimauga Sasae):** Lau Afioga i le Fofoga Fetalai pe maua se avanoa.

**FOFOGA FETALAI:** Tulai mai le sui usufono mo Vaimauga Sasae.

**Afioga Sulamanaia Fetaiai Tauilili Tuivasa:** Masalo e le fia faalavelave foi i le saunoaga a le sui usufono. O le sui usufono foi o se uo mamae lava, ae ona o lea e faafofoga foi si au Ekalesia. O au ou te auai i le Ekalesia Katoliko. O lea ua taua le suafa o le Patele o lenei Ekalesia, toe tau ai ma le segasegamou. E fia iloa la, e fia malamalama lenei sui usufono, po o le a le mea ua afea ai fua ia... E fia malamalama i le tuuaiga lea ua tuuaia ai. E leaga e le mama le tuuaiga o le aufaigaluega paia a le Atua i ni lauga a ni sui usufono.

E pei o le agaga lena ua ou tulai atu ai mo le sefeina foi o lea foi Patele, leaga o le Patele lea sa ou tama tausi i ai. A o lea ua pei ua taua, e manumanu ai le sui usufono, leaga o le aufaigaluega paia a le Atua. A na faapea o se mea lelei ae leaga o lea e tau mai ma le segasegamou. Ou te le iloa po o le a le uiga, leaga o le Maota lenei, e tatau ona malamalama le atunuu, aemaise foi o le faafofoga a Samoa i lauga nei. E pei o le agaga lena e faatu atu ai, a faapea o se mea lelei, ia ae a faapea e leai, ia e tatau ona toe aveese ia saunoaga, leaga o lea ua tuuaia le aufaigaluega paia a le Atua. Aemaise o le

Patele a lenei foi Ekalesia, i le lauga a le sui usufono. Ma lou agaga faaaloalo.

**FOFOGA FETALAI:** Ia se i tulai mai lava le Taitai o le Maota.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi:** Ou te manatu o lea ua manino le finagalo o le sui usufono, e le o se mea fou foi faatoa fou nei, o mea ua leva ona tatou talanoa ai. E le taumatea foi ua leva ona silasila le Komiti o pulega, aua o lea ua leva ona faafoe e le Komiti lea o Gambling. O lona uiga o le Faalapotopotoga a le Malo lea e faafoeina le bingo. E leai se mea e le i oo i ai le latou faatofalaiga. Ae faamalie ia le sui usufono o lea ua manino lau mataupu, o le faaiuga ia lea ua alu loa. Ae pau lava le itu taua, ou te taumafai e faamatala, e le i faigofie i le Kapeneta ona soalaupule le mataupu lenei tau bingo. I le itu lea o le taimi lenei o le Koviti-19. E le mama foi le tulaga lava lea e saunoa mai ai le sui faatoa faamaui atu nei lona tootoo, i le itu lava lea o le faataua e tina, e aua nei tuulafoaina fanau. Aua e i ai lava le taimi e aveane le naunau o le tina, e lau e tafao i le bingo, ona tiai ai lea o fanau. O le isi lea vaega tonu lava lea na saunoa i ai le Afioga i le Fomai, e taua ai le mea lea ua faatino nei o le TV bingo. O le mea lava ia o le bingo, o le gambling, e leai se mea e eseese ai ma isi mea e pei o le faatau o pepa lulu. O lea foi ua sue tupe ai le tele o ekalesia, e maua ai latou seleni, mai le gambling. E pei na o le pau lea o le gambling e pei e oo loa i ai, ona faataga lea. Ae o lea foi la e faataga ai le Malo, ona o lea e silafia lelei e le Minisita ma le Matagaluega, e i ai le itu taua e faigofie ai. O le isi e faigofie ona lafo le tupe, e auala atu i le bingo, na i lo le tuu i totonu o le ipu i le falesa. E pei e i ai le mea foi lele, a tuu i i i le ipu, e faigata ona iloa pe maua ai, pe fia ni ona ai e maua ai e alu ai i le parataiso. Ae a tuu i i i le bingo, e ono maua ai le \$20 faaopoopo e faatau ai meaai a tamaiti. O le tele lava o taimi, e alu atu le \$20 sau ua laki ua maua le \$300, ua atili manoa atu ai lava lea. E alu alu ua alu atu le \$500, faatoa maua le \$100, e le o manatu lava le isi tina, i le tupe lea e alu, ae pau lava le mea e manatu i ai, o le tupe lea e maua. A o le taunuuga o lenei mea o bingo, ua faamativa uma ai le toatele o aiga, le totogia ai pili, faaletonu atu ai ma le fanau. Lau Afioga i le Fofoga Fetalai, e tele lava aiaiga o le mea lea o le bingo. Ae ua matua pogisa ai lava manatu o nisi o tina, talu ai ua fiafia tele e naunau e alu e tafao, o le mea lava lenei o le fia tafao.

Lau Afioga i le Fofoga Fetalai, e le faitioina foi nai tina, e le afaina tatou e omai i le Ofisa, e fia selau teine aulelei e tilotilo i ai, e pasi ane lea, pasi ane lea, ae ona o le toeaina lava, e tilotilo i ai le loomatua i le aso atoa. Ua fiu foi la e tilotilo ia te oe ma ou foliga, a o lea e fai mai ai le tala a le isi toeaina, tatou nei i tua, se i tulou lava. E fai ma e tietie i le pasi ma e alu e tafao i Apia, faapena foi ma le tina, na i lo lou faatu atu i le isi tulimanu o le fale,



faatu mai le loomatua i le isi tulimanu o le fale, te i lava ua misa matutu. Ona ua fiu le isi e tilotilo i le isi. Lau Afioga i le Fofoga Fetalai, o le toe faaopoopo atu lena. O le mataupu se o lea ua manino. Ae ou te lagona toetiiti lava uma lau faaiuga, leaga e fia fai foi sina au upu i le taua o le manatu o lo o e aumaia. Ae see ese ia ma bingo o lea ua malamalama ia mea.

**FOFOGA FETALAI:** O lea ua fautua atu le Taitai o le Malo, o lea foi na saunoa le sui usufono mo Vaimauga Sasae. Ia faaeteete tatou mai le taua o le paia o le aufaigaluega a le Atua, aua e le mafai ona tali mai i latou. O lo o faapena ona ave i ai la tatou faamuamua. Ia aveese mai faamaumauga ia mea e pei ona taua le sui usufono. Ua le maua i lau faalogo, ae afai e moni, ia aveese mai faamaumauga. Ae tulai mai le sui usufono e faaiu maia lau saunoaga. O mea lava ia na e saunoa ai foi talu ai, o lea o le a e toe aumaia foi. Ae malie le sui usufono e see ese ma faauma mai loa lau saunoaga.

[Upu na faatonuina e le Fofoga Fetalai e aveese mai faamaumauga o le saunoaga a le sui usufono mo Palauli Sisifo - [*“Lea sa tatalo ai Patele Tovio e faamanuia atu ai i le falepia, ia, ma le Segasegamou.”*]

**Afioga AFOA AMITUANAI FALEULU MAULI:** Ia faafetai i lau Afioga i le Fofoga Fetalai, na o sina faamalamalamaga lava i si ou uso lea o Sulamanaia. Na ala ona ou taua ia Patele Tovio, o le Patele lea sa faia lau faaiipoipoga maua ma lou toalua, Brenda i Mulivai. O lau uo mamae, e ma te savalivali mai foi i se taimi i Moamoa a o ou nofo i Sinamoga. E ma te savalivali mai lava, oo atu i le agaga lea i Lotopa, e lelei tele le ma mafutaga. E ala ona ou taua le toeaina lea, e pau lea o le faifeau toa, sa i ai i le vaitaimi lena, na mafai ona valaaulia e alu atu e tatala le falepia. Aua e fefefe uma isi faifeau e o atu e tatala le falepia, faapea o se mea leaga. A o le toa o le toeaina, ma lona agaga lelei na ala ai ona alu atu e tatala ma tatalo e faamanuia le falepia. E ala ona ou taua le segasegamou, na faamanuia foi e le toeaina ma le segasegamou, e oo i manulele, manufelele, e pei o le ala lea na ala ai ona ou taua. E le faagaloina ia te au lena toeaina. A o le agaga lena na ala ai ona ou taua, ae le o se isi itu, o se Patele lelei tele.

O le a see atu la lau...o le a talia le fautuaga lau Afioga i le Palemia, o le a see atu i le isi mataupu a tatou. O le fesoasoani i le Tourism Industry lea sa ou taua ananafi. E na ona tuualalo atu lava i le Minisita o Tupe, e faamolemole, avane sina fesoasoani mo nai Tourism Industry, Hotels, Motels...

**FOFOGA FETALAI:** Ua maea ona faamanino e le Minisita ananafi. Leaga o lea o le a e toe foi i le mea sa faamanino e le Minisita ananafi ma tulaga o lo o i ai.

**Afioga AFOA AMITUANAI FALEULU MAULI:** O lea sa ou talanoa atu i le Minisita o Tourism, ae pei o le fautuaga o lea e ave i le Minisita o Tupe. Ona o le tulaga lea, e \$900 miliona a tatou tupe ia e maua mai i le Tourism Industry. A o le taimi lenei, ua leai ma se mea, a avatu po o sina \$50 miliona e fesoasoani atu ai i nai a tatou pisinisi nei, either o tulaga foi ia tau short terms, long terms.

**FOFOGA FETALAI:** Ia malie le sui usufono, o la se i toe saunoa mai le Minisita e faamalamalama le itu lea.

**Afioga Hon Sili Epa Tuioti (Minisita o Tupe):** E na o sina faamalamalama lava, e le na o Samoa lea ua malepe uma nei mea, vaega ia i le tatou turisi. Ae tataua ona...masalo e le o manatua e le sui usufono, sa tele le tupe lea sa ave e fesoasoani ia i latou ua le toe i ai ni galuega. Sa faigaluega i le Tourism Industry, ia sa ave i ai vaega tupe e fesoasoani i ai, aemaise o le tulaga ina ia faapea ona, faaaauu pea ia polokalame faale-aoaoga ia aua nei galo o latou agavaa ia sa i ai. O lo o i ai foi le fesoasoani o lo o ave ia tatou faletalimalo. O le tulaga lena e faaaoga a tatou local tourists, i tulaga o le faalauiloa. E mafai ona o atu i ai le atunuu i week ends po o tulaga faapena. E i ai faletalimalo o lo o manuia tele i tulaga na, a o le pei ona taua, e le na o Samoa ua faaletonu, o le lalolagi atoa. Ae tatou tatalo i le Atua ia i ai se taimi ua toe faafoi ai lea, ua le toe i ai ni afaina i le Koviti-19 ma nisi faalavelave faale-natura. Ae tatou toe tapena atu le tatou tamaoaiga, aemaise lava i le tulaga lea o le tourism. Faafetai.

**FOFOGA FETALAI:** Ua maea le taimi o le sui usufono. Ia tulai mai le sui usufono, ua maea lou taimi, ae po o le a sau upu e fai i le itumalo.

**Afioga AFOA AMITUANAI FALEULU MAULI:** Ia faafetai i lau Afioga i le Fofoga Fetalai, e fia fai atu sau faafetai muamua i lau Afioga. Ia avea lenei taimi ou te momoli atu ai lau faamalo ma le faafetai tele ia te outou o toe ulutaia o le Palemene o le Malo, malolo manumalo mai la outou tautua matavela i le Palemene o Samoa. Lau Afioga i le Fofoga Fetalai, Toleafoa Faafisi, malo le fai o le faiva. Ia faafetai i lou onosai ma le faapalepale i le Palemene, aemaise si ou atalii faipule lenei, fai mai le upu, e fai fai lava lelei. Lau Afioga Aeau Peniamina, o le isi toe ulutaia o le Maota, malo faafetai i galuega lelei uma, ma le ta soosootaua ma le tatou Komiti o Tulafono Tumau. I lau Tofa Faasootauloa Pati, malo faafetai i galuega lelei uma na e tautua ai ia Samoa, e auala atu i le Palemene. Ia ta

feiloai pea ia Heems Gym, e faamalosi o ta maso, ma tuai ai ona uma le ta laiti ma le aulelei. Lau tofa Mulipola, ia manuia tele au fuafuaga mo le lumanai, faamanuia le Atua, ma toe feiloai pea i se taimi.

E avea foi lenei avanoa ou te faafetai atu ai i lau Afioga i le Palemia, le Taitai o le Malo ma le taitai o le tatou Vaega Faaupufai o le HRPP, mai lau taitaiga mai o le tatou atunuu pele o Samoa i nei tausaga e tele. Ua tatou aea ai i nei faamanuiaga e tele, e oo atu lava i le isi 50 tausaga po o le 100 foi tausaga. Ou te talitonu, ae e te le i fanau mai sa iloa ma tuuina mai e le Atua Silisili Ese lou tiute ma lou valaauina e te fanau mai i Lepa Aleipata, ma avea oe ma Palemia e tausii lona atunuu pele o Samoa. Ma e faalogo foi Samoa ma Taitai o le lalolagi i lau Afioga.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui:** Lau Afioga i le Fofoga Fetalai, ou te iloa lava le mea sao ma le mea e faamimita ai. Ae pau lava le mea ou te le o mimita ai, o Lepa ia o Lepa, e le o Lepa i Aleipata, e ese lava Aleipata. Ae o si tamai setete lena e i le itu atu i sasae. Lau Afioga i le Fofoga Fetalai, e ese lava Lepa, ese Aleipata Itupa i luga, ese Lotofaga. Ou te le faitio i lou sasi, leaga e te sau mai Savaii. A o le sasi o le toatele o le mau Upolu iinei, e faapena, e le iloa po o taitaina oe e le sasi o le toatele o le mau Upolu. A sau ua Lalomanu i Lepa, o le isi taimi, o Lepa i Aleipata, e leai e tulaga ese lava Lepa.

**FOFOGA FETALAI:** Ia o lena, o le saoga lena, ae a sue le pepa fanau, leaga o lea sa e saunoa sa fanau i Lepa. E leai a sue le pepa fanau sa fanau le Palemia i Fasitoo-uta, a o lea ua tulai mai i Lepa. Malo faafetai, faafetai le faaea. Faaiu mai loa le saunoaga.

**Afioga AFOA AMITUANAI FALEULU MAULI:** Faafetai i lau Afioga i le Fofoga Fetalai. Ia po o Lepa po o Fasitoo na fanau ai le Afioga i le Palemia, o Samoa lava lea e ...o le Isaraelu lona lua lea i le lalolagi o Samoa, lea la ua fanau ai le...E pei ona fai atu muamua, ae tatou te le le i fananau mai, ua leva ona iloa e le Silisili Ese. Po o fea e ave oe e tuu i ai, e pei ona ou taua, na aumai lava Tuilaepa iinei i Samoa aua le vaaiga o le tatou atunuu. Ia e pei ona ou faaali atu i le Fonotaga i Petesa, e tumau pea le lagolago a Afoa Amituanai Faleulu Mauli ma lou itumalo, i lau Afioga i le taitaiga o le tatou HRPP ma le tatou atunuu mo le isi 5 tausaga o lumanai nei. Pe a tusa ai ma lou malosi soifua maloloina, toe faaopoopo i ai ma le isi 5 tausaga ua 10 i ai tausaga e te toe taitai ai le Malo o Samoa.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui:** E pau lava le mea ua ou

tulai atu ai, ou te toe fautua atu, a tau lou igoa atoa, ia tau loa ma le upu faapea, numera 2 i le pepa palota.

**FOFOGA FETALAI:** Ia malo, faaiu mai loa le saunoaga, malo faafetai, ua ese le manaia o le faaiuga o le saunoaga a le sui mamalu.

**Afioga AFOA AMITUANAI FALEULU MAULI:** Ia faafetai i lau Afioga i le Fofoga Fetalai. Ua sasi ia te au ona ou faafetai i le tama matua ia Dr. Tuitama, o lau uo faapelepele i le Palemene. Ia faamalo faafetai Tuitama mo galuega lelei na e faia mo Samoa. Ia faamanuia foi le Atua i lau Afioga e tusa foi ma nisi tiute ma galuega o le a feagai ma oe. Mo le silafia, a faamanuia loa Afoa i se tagata e manuia. O Afoa ua valaauina e le Atua e fai ma ave feau e momoli atu ia tulaga foi i faamanuiaga faapea mea e ono faasaoina ai ia tatou tagata, e le gata i Samoa a o atunuu i fafo.

**FOFOGA FETALAI:** Ia malo saunoa i le sui mamalu, faafetai.

**Afioga AFOA AMITUANAI FALEULU MAULI:** Lau Afioga i le Fofoga Fetalai, ua maea atu mataupu, ae se i ou faasee atu i si ou itumalo. O si ou itumalo pele o Palauli Sisifo. Ia faamalo lava le tapuai, sa outou tui lava le mulipapaga ma nofo tatalo a o feagai pea lo outou sui ma le usugafono. Lou itumalo, o lea tou te silasila mai o lea lava e lava le malosi o la outou sui usufono, ua matua fit lava. Afai e i ai so outou finagalo ia maua mai se tofa ma se faamanuiaga aua foi le isi 5 tausaga. O la ua outou silasila i le tele o galuega na faia e la outou sui usufono, ma o le a tele foi galuega, o le a toe faatino e le isi 5 tausaga pe ou toe oo mai. E pei ona outou silafia, o lea na tofia au e le Palemia e avea ma sui usufono i le itu fefaatauagai o le tatou pati. Ia sa tuu foi au i le tulaga foi lea o le sui i totonu o le Komiti o Tupe ma promote ai lea o au i le isi foi taimi, i le Komiti lea o Tulafono Tumau. Ou te faafetai atu i le Palemia, aua a na faapea e tofi au faa-Minisita muamua, o lona uiga ou te le maua le malamalamaaga lea ua i ai nei. E tataua ona amata uma atu lava tatou o sui usufono i i i totonu o Komiti ia. Aua tou te naunau tou te fia Minisita. O lea la ua ou talitonu, ua onomea ma talafeagai ona faa-Minisita au i le isi Paeaiga, ua ou pasi uma i mea uma ia.

**FOFOGA FETALAI:** Ia malo faafetai, ua...

**Afioga AFOA AMITUANAI FALEULU MAULI:** Lau Afioga i le Fofoga Fetalai, e tasi lava si mataupu lea ou te fia tuualalo atu ai i le Minisita o le Soifua Maloloina, faamolemole se i tagai ane lava. O lo o i ai ia fualaau foi ia e ono mafai ona foia ai le faafitauli lea, e aunoa ma ni tui e manaomia ai. Na o se fautuaga ma se tuualalo ina ia toe silasila ane i ai, ae na ua ia

outou lava le faaiuga. E peiseai e faaiu atu faapena... O musumusuga nei a le Agaga Paia lea e fai mai ia te au, o lea ou te momoli atu. Aua o lea ou te talitonu i le fautuaga a Tui le Palemia, a e iloa se mea e faia ae le faia, o le agasala le mea lena. Ou te le manao la e uma lou taimi lenei i le Palemene, e le i faaleoa le feau taua lea i le Palemene. E le gata mo Samoa ae mo le lalolagi atoa. O lea la o le a ou moe lelei nanei, o lea ua uma ona avatu le feau a le Atua i lo tatou Palemene. Tagai ane i ai, a i ai se mea e ono manaomia le fesoasoani a le faipule, vili atu e fiafia lava e tali.

**Afioga Hon Faimalotoa Kika Iemaima Stowers (Minisita mo le Soifua Maloloina):** Lau Afioga i le Fofoga Fetalai, mo le faasaoina o le tatou taimi, o lea ua silasila mai le sui mamalu. O lea ua faamau e avatu i o i fomai e tele lo latou malamalama i tatou vailaau. Ae faafetai o lea ua faamau le finagalo, ia manuia le faaiuga o lenei aso i le sui usufono ma lana lauga manaia.

**FOFOGA FETALAI:** Ia malo faafetai, ua manaia le faaiuga o le saunoaga, ia faafetai atu, avea foi lenei avanoa e momoli atu ai le faafetai i lau Afioga i le sui mamalu, e tusa o le saunoaga. Ua faafofoga tapuai mai foi le itumalo, ia malo.

*Na faailoa le agaga fiafia o le Palemene i le patipati o o latou aao ina ua maea le saunoaga a le sui usufono mo Palauli Sisifo.*

**FOFOGA FETALAI:** Ia tulai mai lau Afioga i le Palemia.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui:** Lau Afioga i le Fofoga Fetalai, sa ou le manatu ou te vave tu atu i se mataupu e fia faamalamalama. Ae taua tele, sa laga e le sui usufono i lana saunoaga. Ua mafua ona ou tulai atu ona o le tele o le vaega o lana saunoaga, sa aumai i se tulaga foi lea faa-Faataoto. O lona uiga o tua atu o le faaupuga, o lo o taoto ai nisi o uiga loloto, e le tatau ona laaloa ai se manatu, e tatau ona faataua. Ona o ni mataupu ua fesiligia soo i totonu o le Maota e oo lava i se tasi o sui usufono ua leva ona i totonu o le Maota, ma ua laa ese atu ma le Vaega Faaupufai o fia malamalama ai. A o se manatu taua tele, ou te taofi e tatau ona toe oo i ai sau upu, e momoli ai le faamalo i le sui usufono. Ona ua ia laga tonu lava le fatu, o le fesili na tuu mai ia te au e le tamaitai matua o lo o i le vaega lea o le FAST. Fai mai le saunoaga a le sui usufono, e mafai ona ou faapuupuua atu. I le tulaga lava ia o le sui usufono, i totonu o se Vaega Faaupufai e le o aveesea lona saolotoga e faaleo ai lona finagalo.

E 2 la mataupu ogaoga, o lea e aumai faa-Faataoto ae tatau ona ou toe pai i ai, leaga o lo o taoto i totonu i se tulaga o lea sa fesiligia ai au, e 2 vaega. O le vaega o le sa i mea nei o Vaega Faaupufai i totonu o upufai o Malo ma

le saolotoga o le sui e auai i totonu o le Vaega Faaupufai. Ua tuuaia soo lava au e le Sao Faapito i le vaega lea, e faapea ou te pulepuletutu ae atagia ai le ituaiga lavelave lea ua aumai tonu lava e le sui usufono. I le saolotoga o le sui usufono, e faaleo ai lona finagalo, e le gata i totonu o fonotaga a le Vaega. Ae o lea foi e aumai manino i luma o le Maota, o lea foi e taofiofi mai lava e lau Afioga ia le sui usufono, ae le uma lava le naunau e finau. E le gata i totonu o le Maota lenei, a o totonu foi o le Vaega Faaupufai. Ou te manatu la e faataua le itu lea, ona o le ave soo, ave soo, ave soo e le sa fai ma ou lima taumatau, le manatu lea, ua le aoga le Palemene ua leai se Palemene. Ua pulepuletutu le Taitai o le Malo, a e o le itu la lea, o lea e taua tele. E oo lava i lau Afioga i le Fofoga Fetalai, e taofiofi gata le sui usufono mai le laasia o le tuaoi e paia. O le tuaoi na o agelu ma lau Afioga i le Fofoga Fetalai e alala ai. Ma ua lalata atu lava i le tuaoi, e ono toe faatulai ese ai le sui usufono mai le Parataiso lea e alala ai lau Afioga ma agelu. Ona o le naunau, naunau e molimoli mai se mau, o lea la ua faafofoga lelei i ai. O le ala lena ou te fiafia ai, ina ua oooo lava saunoaga a le sui i le itu lea, ae molimoli mai ai le faamaoniaga o upu, sa ou faatalanoa ai au, ma ou teetee atu ai, o se manatu vaivai tele i le tulaga e faapea. Ua taotaomia se finagalo saoloto o le sui i totonu o le HRPP ona o nei mea o Vaega Faaupufai. O lea la ua matua matilatila, e oo lava ia te au, e oo i sui usufono o le Maota lenei, e faataututu lava ma le sui usufono. Ma o lou fiafiaga lena lau Afioga, ona e le faapea la e na o le sui usufono, ae aafia ai foi ma isi a tatou sui usufono. Ua faafia ea ona finau i totonu o le Maota lenei, a o le avatu matilatila lava o se famatalaga, faapea e pulepuletutu le taitai. E atagia ai i ina le leai o se malamalama i le atoaga o mea nei, ma le taua o mea nei o Vaega Faaupufai. O Vaega Faaupufai, e le o se faiga faavae e faapea na amatamea ai i tatou iinei, na amata mai fafo. E faapea foi i le Palemene lenei, na amatamea mai fafo, e faapea foi i le palota, na amatamea mai fafo.

Lau Afioga o upufai o Malo, o upufai nei tatou te aafia ai, o mea uma lava e amata mai fafo. E tau saili ai se tulaga e faafoe ai le Malo o Samoa, ma aoao manogi ina ia tupu le atinae o Samoa ma maua galuega mo a tatou fanau, maua le manuia mo tupulaga. E le gata i tupulaga o nei ona aso, a o tupulaga fai mai. O le mea lena e taua tele ai mea nei o Vaega Faaupufai. Sa taufili ai le Sao Faapito, po o le a ea se faiga e tataua ona fai e ola ai Vaega Faaupufai. E puupuu lava le tali, leadership, leadership, leadership i le taitai leadership o taitai uma nei, e pei o le taimi lenei, e 44 pe 45 le aofai o le tatou vaega. O le leadership o faipule uma lava, o lea e i totonu o le Vaega Faaupufai. O le leadership lena e mafua ai ona maooopo faiga nei o Vaega Faaupufai. E le o ni tupe. Aisea? Na faatu lava le Vaega Faaupufai lenei i le 1979, e leai ni tupe na maua ai, leai ni tupe. Alu le matou sailigatupe i Amerika, ou te le iloa pe tai oo i le 200 toga na matou o ma matou, ave ma oloa eseese, koko Samoa, ofu palolo, mea faapena, o i'a. Na matou o ona matou o lea i luga i San Fransisco i aulotu sa valaaulia ai matou, toe omai i

lalo i LA, toe omai i i Hawaii. O le tele ia o le matou tupe na maua mai ai e \$14,000 tala Amerika. Lau Afioga, e \$14,000 tala Amerika. Na matou o ai ma toelaiina nei o Tofilau, o Tuala Tiresa, matou o ai ma Mata'u, sa faipule, matou o ai ma Polataivao Fosi, matou o ai ma Pule Lameko. O tama na sa i ai i lena taimi.

I le taimi lea o le 1987, ua avea nei le Vaega lenei ma Itu Agai, i luga o le pule lea faa-faipule o le Palemene i le feoai saoloto faapea ua tuu le vaega na omai i ai ae o i le isi vaega. E le o le finagalo o le atunuu, a o manatu faapito o sui usufono i totonu, feoai, lea la pei ona feoai ese atu sui usufono ia e toatolu mai le Vaega lenei, ona avea ai lea o matou ma Itu Agai. O le taimi lea na matou faaogaina loa e saili se fanua ma se seleni e fau ai le Maota o le HRPP. O taitai ua lotogatasitasi, ua le avea lo latou mamalu, ae taitai lava e Tofilau, ua le avea o latou mamalu, ua matou o i le ala, saili seleni i San Fransisco, matou omai i lalo i taavale i LA. A o a matou mea sa fai? Na o le matou tutu lava i luga ma usu le matou pese, o au le isi sa ta ukulele ai i ina, sa ta kitara ma matou usupese ai i ina, ae omai aiga. O le tele lava la na o ane, o aiga o le Afioga i le Tootoalii lea na maua ai le \$13,000 lea. Lau Afioga, o le 1987 na tupu ai le mea lena, ae faatoa fau le fale lea, le Maota o le HRPP i le 1991, na matou o aumai seleni, le loan e silia i le \$100,000, na guarantee e le Afioga i le Palemia ma au, matou guarantee ina, ave ma le talosaga, maua mai le fanua lea e tu ai nei, e \$8,000 le totogi.

Lau Afioga i le Fofoga Fetalai, na o le pau lava ia o mea na matou faia, a o lea e fai lava i le taimi nei. O nai aso fanau e fai. Matou te le i o i se Ekalesia ave se tatalo i faifeau e aumai ai ni tupe, sa o i tua talanoa i nuu foi lele i le tulaga lea o sui o le Vaega e omai i tua, e fou lea mea. Lau Afioga i le Fofoga Fetalai, i le tuufaatasitasi o loto ma agaga, lea na mafai ai ona tulai mai le HRPP, e leai ma se tupe. Matou o aitalafu mai le \$13,000 na aumai mai o, e le taitai lava ai se Maota. E oo foi la i laupapa o le fale, ona o le matou manao ia taugofie na matou o ai aumai oga tamaligi se i tulou, ona tipitipi lea i le ili aumai faalala, masalo pe 6 masina ua mago lelei ona vali loa lea i le suauu, lea la e i ai le fale lea e tu nei lau Afioga i le Fofoga Fetalai. O mea ia sa matou faia i le taimi lena i le le tagolima, ae leai se seleni. Sa lotolotoi ai mai le 1985 le Sao Faapito, ou te manatu sa tatau ona malamalama i mea ia, ae foliga mai e matua leai ma se malamalama i nei mea sa matou faia.

Lau Afioga i le Fofoga Fetalai, o le agaga atoa lena o le mea lenei o le Vaega Faaupufai, e le taomia i lalo sou finagalo, e faaali i totonu o le Vaega lenei, faaali i totonu o le Maota lenei. O lona uiga, o faaaliga uma ia e fai nei, o le matua taufaasese. Afai e pepelo i mea iti i totonu o le Palemene lenei, e le taofia fafo, o le matua tetele o nei pepelo e fai i fafo ma sese ai ma le toatele o le tatou atunuu.

Lau Afioga i le Fofoga Fetalai, o i ina e maua ai Vaega Faaupufai maopoopo, lea sa tau fesili seiloga e avatu tupe. A avatu nei tupe pei ona talosaga mai le Afioga i le Sao Faapito, o lona uiga, o le taimi lava e alu atu

ai tupe, o lona uiga pe oo i le 1,000 ni Vaega Faaupufai, pau lava lea o le mea e agaga i ai, o tupe, tupe, tupe i taimi uma. O le a le mea na faavae mai ai le Vaega lenei? E le o ni tupe na faavae ai, e le o ni tupe, o le lotomau ma le loto faamaoni. Lau Afioga, o le lotomau ma le loto faamaoni e omai e talai le talalelei, o mea e tatau ona fai.

O le ala lea o lea ou te ave ai le faafetai i le sui usufono, e loloto mea ia na ia aumaia e tali atu ai i tuuaiga le faavaea. Afai e saina pepelo le igoa i i ma toe faatonu e le Fofoga Fetalai lē fai mai o le taitai ma toe faatonu a o faafogafoga Samoa, o le a se isi mea i tua atu e le miga e pepelo ai? A lea foi ua alu atu ai ma le Sao Faapito ma isi. O Olo lava ia o lona ia lava lea natura. A lea e salalau lava i luga o pepa i faasalalauga mai Ausetalia mo sootaga faapitoa. Lau Afioga i le Fofoga Fetalai, o le mea lena, o le lotogatasitasi, lotogatasitasi e faatalanoa mataupu, e le gata i totonu o le Kapeneta, ae faapena foi i totonu o le Vaega Faaupufai. Ua faafia ona talanoa le mataupu lea i le palota a tamaitai? E i ai lava nai sui usufono sa lagalaga le agaga foi lele i le uncertainty reservation i le tulaga lea.

O lea sa tatou faalogo atu nei i le tala mai fafo talaatu anapo, ua 50 nei tausaga o sami le aso fiafia tele lava i Suiselani, ua 50 ai tausaga faatoa mafai ona palota tamaitai. Aisea? O le agaga lea o lena Malo tautaua, o tina lava latou o le latou lava lea tiute o le nonofo i fale e vaavaai tamaiti, fai meaai, faataele le toaina pe a mai, e le tatau ona faaaogaina, e le tatau ona o i nei mea o palota, na o le nofo lava i le fale ma tausi tamaiti ma fai le meaai aua papa la e faigaluega. O le tulaga lena. A fua la i ai, e 50 tausaga talu ai. Ae a tatou? E 30 tausaga talu ai. Tatou te le o mamao ese lava la ma le tulaga lea e i ai uiga nei faava-o-Malo, o lea tatou te piipii atu lava ma tatou matau taualumaga, taualumaga mai fafo ma taualumaga i totonu. Sa fesiligia au e Malo Afaatasi e i ai le savali na sau, pe aisea ua leai ai se faiga faapitoa mo tina i le taimi lena ae le i faia le Tulafono lea na fai, na faatoa fai nei i le 2011. O le Tulafono lea ua i ai nei, e le tatau ona pau ifo i lalo ifo o le 5 le aofai o tina. O lana fesili lena. O lau tali, e toa-lua na omai, o lau tali i ai, “O le tofamamao i le Malo o Samoa i le Faavae, o lea lava e matala, e le o taofia tina, e mafai lava ona 50 sui usufono tina i le Palemene, e le o taofia tina.” A o le a la mea lea e tupu? E le o mafai ona faamautinoa se tina i le saolotoga lea e i ai.

O le mea lena na agai ai le manatu, o le a fai loa se faiga ina ia i ai se Tulafono ina ia ta mau, ia maua ae le i lalo ifo o le 5. E i ai lava lou talitonuga, e ono ova atu pe ono atoa lava le 5 i le tatou faiga palota o le a sosoo ai, ona le faaoga loa lea o le Tulafono lena. O le Tulafono lena, na ala ona fai, tau lava ina se i tali ai le manao lea o lo o ave ai foi le igoa i fafo o Samoa i le tele o atunuu i le taua ma le reform minded o Taitai o Samoa, lea ua i ai i totonu o fuafuaga faalauaitele le agaga. Aisea? Aua foi e ese tina o Samoa, ese tina o isi atunuu. O le a le mea e ese ai? E maoae tele le tulaga lea e aoaoina ai tamafanau a Samoa, lea na outou silasila, e toa-fitu lava tina ia e



faauluulu i Matagaluega na faatauto i le vaiaso talu ai, tina fou, e ese ai isi tina o la e lava e galulue lava i totonu o Matagaluega. O le tulaga lena lau Afioga i le Fofoga Fetalai o le taua. Sa lagalaga i totonu o le Vaega lenei, ae na alu alu lava le faatalanoa tasi loa le taofi, tatou avea i le tulaga lena, ave i le tulaga lea o le faia o se Tulafono faapitua.

Lau Afioga i le Fofoga Fetalai, e faapena uiga o le Vaega Faaupufai lenei, e talanoa, talanoa, talanoa. A tasi loa le finagalo, ave loa i totonu, e le toe mafai ona e toe tifa i le taumatau po o le tauagavale, talanoa i le avatu aumai, le tofa fetuunai, fetalai, o le uta lena a le poto. Ae afai e toe alu ese ai loa le tagata, o le uta lena a le mea o le poto moto. O le fai fai o le iuga, ae toe omai faaali le latou tetee i totonu i i. O le tulafono auro i totonu o le Kapenta Faa-Palemene lea, e fai loa se iuga e taunuu i ai le Kapeneta ae auese se isi, o le taimi lava lena e faaoga ai loa le pule a le Palemia e faatea ese loa, faatea ese loa ma le Kapeneta. O lea e i le Palemia le malosi lena, na fai e Palemia i tua atu le mea lea o le faatea. Na o le tasi lava le taimi lea e i ai nei na ou faia ai le mea lena, o lou fautuaina o le sui usufono mo Gagafomauga Nu.3, e sili ona e faamavae mai ma le Kapeneta, e mataga le mea lena e te aafia ai. E le tatau ona faia le lua Faamasinoga, ua fiu le mea e taofi atu e o e fofo i tua, ae te lua mananao lava e o e ave i le Faamasinoga. Ia e faamavae mai. Ona fai mai lea, “Ae a pe a ou faamavae taeao, o le a ou faamavae foi ma lou itumalo.” Ou fai atu, “Aua e te faamavae ma lou itumalo, se i iloa po o le a le tulaga o Faamasinoga, ae faamavae nei lava taeao pe a fono le Kapeneta.” O lea e faafofoga le Kapeneta i le faamavaega sa fai. A o le a le mea lea na fai? Pepelo foi i le atunuu, e leai na ou faamavae lava au ia i lou loto. O le mea lea o le pepelo, pepelo le mafaufau.

Lau Afioga i le Fofoga Fetalai, o lena. O le Vaega, a e sau loa i totonu, e te tuutuu loloto lava lau tofa, o tupu ma ee o Samoa, o tupu ma ee o Samoa. Ma e leai se feau a le isi sui usufono i le isi sui usufono, e sa. Ae ona o le agaga lea faa-Vaega ua lotogatasitasi, lotogatasitasi e faatino se faiga faavae e manuia ai le atunuu ina ua talatalanoa ma talatalanoa ma talatalanoa i itu lelei ma itu faale-lelei, o i ina e iloa ai le mea e igoa o le true leadership. Lau Afioga i le 44 le aofai o sui usufono o le Vaega lea, o lo o i ai le lototoa, e tasi loa le finagalo, fai loa. O le tagata lava e auese ai, ua fai lava e ia lona faaiuga. O le mea lena e igoa o le Pati o lo o i ai le leadership. A o le mea lea o le Pati e le iloa po o ai le Taitai, lau Afioga, e le mafai ona talitonuina e se atunuu, aua o upu uma lava e fai, e le mafai ona talitonuina se upu e talanoa i ai. O le a faapefea ona talitonuina ni folafolaga e o fai i tua, a o totonu o le Palemene, o lea ua aliae ai le talapelo, latou uma lava ia e toa-fa. E oo i se faaiuga faigofie o le tofia o se taitai, e matua le iloa lava tofi se taitai. Aisea? Aua e fia taitai uma lava. O le a la le uiga o ia Vaega? O se Vaega e matua le maopopo. A o le a le fetalaiga a lo tatou Alii? O le Malo e vaevaeina, e le o se Malo e tumau. O se Malo faapea e fiafia i ai le atunuu, e manao i ai le atunuu lenei, o se malo fevesiai? Lau Afioga i le Fofoga

Fetalai, e le o ia te au le tali, o le tali, o la e i le Atua, e musumusuina le mamalu o Samoa o le a agai e fai lana filifiliga.

Ia, ou te toe faaiu atu ai, ou te faafetai i le sui usufono na e aumaia i se tulaga faa-Faataoto mataupu loloto ia, lea e faigofie lava ona misi i le vaai, ona e fai lava si loloto. Afai o lea e oo lava i le sa avea ma Sui Taitai o le Vaega lenei e matua le malamalama, a faapefea la ona fai? E i ai le fono sa matou faia e le matou lava Vaega, sa vevesi, ona te i lava lea ua faitioina au, o le lolo o lou taofi i le mea o lo o i ai le finagalo o le Vaega. O lau tali lea na fai, o lea e alaala mai i i nisi sa i ai, o sui usufono mai lona Nofoaiga. “Lau Afioga i le Sao Faapito, o au o le Taitai, ma e faalogo le Taitai i le mea o i ai le finagalo o lana Vaega, ae afai e te tu lava oe, o lau upu lea na ave i le Sao Faapito i le fono sa fai. Afai e te tu lava oe e alu lava oe ae le amanaia sau Vaega, e te toe tilotilo mai tua, ua leai se isi o mulimuli atu.” O le tali lona, ou te faamoemoe o la e faafogafoga mai le Sao Faapito ua leva ona i i ae le malamalama i le tali, o le tali o mea o Vaega maopoopo, leadership.

Lau Afioga i le Fofoga Fetalai, o le faafetai lona, ma o se tasi lenei o lauga taua tele ua aumai e le sui usufono faatoa faamavae atu nei lona tootoo.

**FOFOGA FETALAI:** Malo faafetai. Malie sui usufono mamalu se i avatu se tala a le Nofoa. Ou te fia fesoasoani atu i le faasaoga o lo o pau i le saunoaga a le Afioga i le Palemia, ua taua le itumalo o Gagaifomauga Nu.1, leai o Gagaifomauga Nu.3. Ua na o se faasaoga lona mo le saunoaga e...

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui:** Lau Afioga i le Fofoga Fetalai, ou te faamalulu atu i le sui usufono mo Gagaifomauga Nu.1, e tataua ona faamagalo mai, leaga o outou e nonofo i le isi faatausiusiuga, a o au e nofo i le isi faatausiusiuga o Samoa. Ia o le faalavelave lona, leaga o suafa foi e faaigoa ai po o igoa e faa-suafa ai nei mea o itumalo, e le o faasuafaina tonu i igoa o se nuu, e oo lava i mea o tumua, tatou tumua. E tai pei o Lufilufi, e le o faalupeina foi le itumalo o le itumalo o Lufilufi, e le o faalupeina foi le itumalo e i ai Leulumoega o le itumalo o Leulumoega. O lea e faalupe igoa e fai si maotua atu i le sosolo i luga o tatou talatuu. O le ala lona o lea e faavalea ai pea e le sui usufono mo Gagaifomauga Nu.3 le toatele o tagata i Savaii, ua leai se nofoa o Saleaula. A leai se nofoa o Saleaula o lea e nofo mai le sui usufono mo Saleaula? O se taufaavalea maoae lona mea. Ia a o la e ua malamalama tagata, so o se upu lava e saunoa ai i latou uma ia, o le matua pepelo o pepelo, ma ou te lagona, o le tasi lona mea o la e toatamai ai nei Satani, na te le mafai ona ausia ituaiga matatia ia, po o ai e sili le talapelo.

**FOFOGA FETALAI:** Malo faafetai. Ia, masalo ua faapena le tulaga o lo o... ia, e i ai lava le mea e laaloa ai foi le faitau, aua leaga e faigofie le tau o suafa i lo le faaleo o itumalo, o se mea e faigata. E oo lava i le Fofoga Fetalai,

e faapena foi ona laaloa ai se vaai, ae faamalulu atu i le tulaga o le faaleoga o tatou itumalo, ae ona o le tulaga o le mamalu e pei ona tausisia i a tatou Tulafono Tumau. O le mea foi lea, ia e leai, aua ia le tetena le tofa i lau Afioga i le Palemia, o le tiute lava lea o le Nofoa o le faamanatu ma faapena. Ae malo faafetai i le faamaninoga o itu ia, e leai, amuia foi le sui usufono mo Palauli Sisifo ua oo le saunoaga, e ui lava ina puupuu foi. Ia leai e le puupuu na alu ananafi, o lea foi ua toe alu lenei taeao atoa o saunoa le sui usufono mamalu, ae ua e taunuu lava i le taunuuga. O lea ua... silasila foi i le umi o le saunoaga a le Palemia, o le faalauaitelaga lea o lou finagalo e pei ona faaalua. Malo faafetai. E faapena. A o faafofoga mai le itumalo, ia o ai foi ia mo le itumalo ina ia faamanino, e leai e le o saisaitia pe noanoatia tatou o sui usufono, o le tatou tiute lea e tatala le avanoa. Ae ia manatua foi, so o se Vaega lava e maopoopo, o se vaega tumau. A o se Vaega foi lenei e taapeape ma e le mautu, ia e faapena foi, o le tali foi lena i le lumanai. Ia ae afua ia mea i le faamaoni. O le mea la lea, faafetai atu i le sui usufono mo Palauli Sisifo e tusa ai ma lau saunoaga o lea ua faamanino atoa ma talia e le Taitai o le Malo.

Ia, ona o lea ua... Ia se i tulai mai lau Afioga pe i ai se isi...

**Tofa Lealailepule Rimoni Aiafi (Faleata Sisifo):** Ia, o lea ua sauni le sa o le vaatele o le Afioga ia Faumui e saunoa, ae i ai si tamai mea laitiiti lava lea lau Afioga ae le i faia le tatou malologa.

**FOFOGA FETALAI:** Ia, saunoa maia Lealailepule.

**Tofa Lealailepule Rimoni Aiafi:** Ou te nofo lava ma lou loto ae aumai pea i luma. E le toe faaluaina le saunoaga a le Taitai o le Malo e tusa ai o le mea ua tulai mai. Ae i lou talitonuga, ua fai foi si tatou matutua i le Palemene, ae le lelei le mea ua tulai mail au Afioga, ma e le tatau ona tuufauina ona e fesili taeao i le aso, fesili taeao i le aso. O tatou o taitai o le atunuu. Ua e saunoa e le puleaina foi pe aiaina e lou tamai sui usufono le finagalo o lau Afioga i le alofa. Tatou te alolofa uma lava, ae o lou talitonuga, e le tatau ona tuufauina le Vaega lea, ona e ono toe tupu, e faapefea ona tatou taofia mai le toe tulai mai i le lumanai, ona ua taumamaina ma mamasagia ai le Fonousu a Samoa. I lou talitonuga lau Afioga, e tatau ona ave i ai se tusi, e tatau ona faamauiina i le Fono lenei e le tatau ona toe tulai mai ni amio faapea i le lumanai. O au foi ua ou masani i le Itu Agai, e 10 tausaga o ou Itu Agai. Ou te le aiaina foi a latou taumafaiga, ae i ai le tuaoi e le tatau ona fesopoi. O le laualuga o le aganuu a le Samoa, o le vafealoaloi, e faaaloalo atu faaaloalo mai, a o lea ua tausolomua ia tatou.

O le ala lea o lau tuualalo lau Afioga ma valuvalusia aa o le laau, e tatau ona fai ni ai o lenei mea mo le agai i le lumanai. Ma le faaaloalo lava. Faafetai.

**FOFOGA FETALAI:** Ia, se i tulai mai le Afioga ia Faumuina.

**Afioga Hon Faumuina Tiatia Faaolatane Liuga (Palauli le Falefa):** Lau Afioga i le Fofoga Fetalai, o le taua ia o le mataupu lea na saunoa i ai le Afioga i le Palemia. Fai mai le potu o Solomona i lana Faataoto e 6, “E 6 mea e inosia e le Atua, a o lona 7 o mea, e matua inosia lava. O a ia mea? O le mata faasiasia, o le laulaufaiva e pepelo, o lima e sasaa le toto o le tagata e le sala, o le loto e manatunatu i togafiti leaga, vae televavave ona taufetuli i le leaga, molimau pepelo ma le tautala i mea pepelo.” A o le 7 la o mea fai mai, “O le na te faatupu maseiga i uso.” O le mea lena o lea e fai nei. Ia tuu i le Atua, na o le Atua na te faamasino. Tui, o lea ua... O tagata uma lava e faia le amio lea, e o i Seoli. Ma lou faaaloalo lava.

**FOFOGA FETALAI:** Malo faafetai. Ia, e leaga o lau Afioga Faumuina e fai lou tofi i le Ekalesia. Pe e te Peresetene ea i le tou Ekalesia. Ia malo le faasoa mai e aoga. Ou te vaai atu i sui usufono mamalu o le Palemene ua tusi i lalo uma mea ia e 7. Ia alofa ia e faamau lelei e limataitaiina ai tatou. Ioe. E faapena, e limataitaiina ai tatou. Ia, ae o le saunoaga lea a Lealailepule, o le mea e tataua ona fai, ae silasila foi oe, e 2 lava itu o le tupe, so o se mea lava e 2 itu. Ou te manatu i le itu lea, ae manatu foi i se isi itu i aveia lea tulaga ma mea e tuuina ai foi le Fofoga Fetalai leaga o lea ua tatou tulalata i le faiga palota i faapea ai o se agaga foi lenei e faatino ona o se faaleaga i mea la ia e saunoa i ai Faumui, ou te musu ou te lavea ai i mea ia e saunoa ai Faumui. Ae fai lava i le agaga mama, o le Tulafono lava ia o le Tulafono, ae faafetai mo le fautuaga. O le mea sili o la e faafofoga mai le atunuu ma itumalo, e tele lava le paoa lea e i le Fofoga Fetalai. E pei e faapena. Ae faafetai atu. O le a ou fautua i ai pe a taliu mai, maua lea o se matou feiloaiga, o le a ou fautua e ala i le finagalo o le Palemene mo le lumanai. Aua toe pau lenei o le tatou Fono, ae faafetai mo le fautuaga.

Ae talu ai ona o lea ua tatou taunuu i le tatou malologa masani, o le a faataatiese Galuega a le Fono mo lana malologa masani. Faafetai.

*Na faataatiaese Taualumaga a le Fono Aoaio Faitulafono mo lana malologa masani i le itula e 10:46 i le taeao ma toe faaauau i le itula e 11:15 i le taeao.*

*Na toe faaauau felafolafoaiga i luga o le faitauga faalua o le Tulafono Tau Faaofi o le Faatatauina o Tupe Faaopoopo (Nu.1) 2020/2021.*

**FOFOGA FETALAI:** Ou te faasilasila atu ua toe amatalia Tausalumaga ma Galuega a le Fono Aoao Faitulafono.

Malo le onosai, malo le usufono. E faia le malologa ua maea ona saunoa le sui usufono mo Palauli Sisifo, ma ua logoina au e le Afioga ia Faumuina Liuga le sui usufono mo Palauli le Falefa e saunoa, o le Afioga i le Sui Taitaifono o le Komiti o Tupe.

Ou te tapa ma le faaaloalo lau Afioga e tulai maia e saunoa. Manuia le saunoaga.

**Afioga Hon FAUMUINA TIATIA FAAOLATANE LIUGA:** Faafetai i lau Afioga i le Fofoga Fetalai i le avanoa e fai ai se upu a si ou itumalo o Palauli le Falefa, e fai ai sona sao i tonufai o le tatou atunuu e ala i lenei Palemene. Faafetai i lau Afioga i le faatautaiga o le tatou Fono, e le gata o le Fono mulimuli lenei o lenei Paeaiga, a o Fono foi sa e taitai mai ai tatou i le 5 tausaga o le a mavae atu. O lea ua tatou aulia mai le tauafiafi o lenei Nofoaiga. Lau Afioga i le Fofoga Fetalai, e pei o le tatou Fono foi lenei tatou te toe vaavaai ai ma tepa taulai, po o a ni mea na tatou faia i le futia ua sola ua tautala mai i le taimi nei ma sauniuni ai tupulaga fai mai o le tatou atunuu i manuia o le a latou maua, talu ai le faiga o tonu ma faaiuga fai a lenei Palemene, aemaise le Tafatolu o Faigamalo Fefaatauagai e pei ona silafia e lenei Maota.

A o le i faia se faamatalaga i si ou itumalo, e muamua ona ou faatulou atu Samoa i lau tapuaiga. Afio Le Ao Mamalu o le Malo, lau Afioga i le Tuiaana lau Afioga Tuimalealiifano Vaaletoa Sualauvi II ma lau Masiofo. Afio lau Afioga i le Sui o le Fono a Sui Tofia, lau Afioga Le Mamea Ropati ma lou faletua, malo le tapuai.

E faapea foi le tapuaiga i le Tafatolu Fefaatauagai o le tatou Malo, lau Afioga i le Palemia, Minisita o le Kapeneta, faamalo le galulue, faamalo le lē faalogologo tiga, faamalo le finau i mea lelei.

Lau Afioga i le Fofoga Fetalai, e le mama foi le faafetai i lau Afioga i le faatautaiga o lenei Fono a le Palemene a Samoa. Ou te iloa lau Afioga i le Fofoga Fetalai, e tulaga ese le talafaasolopito. Ona, afai o le a tuu ata o Fofoga Fetalai mai lea taimi i lea taimi, o lona uiga e tataua ona 2 ou ata e tuu i luga o nei... ma iloa ai le tele o lou sao. Leapepe, ou te le selu atu, o oe lava o Toeaina o Toeaina, e te faatautai ma le sologa malie mea uma e ui lava ina sousou le tele o taimi tatou te felafolafoai ai. E avatu lelei i ina, e avatu foi mea le lelei i lau Afioga, ae ua e masani, o oe o le Toeaina o Toeaina.

I lenei Palemene i le afifio o sui usufono mamalu o lenei Palemene, se faamalo le lagolago, faamalo le sausaunoa, faamalo i lo outou sao lele ua manuia ai Samoa. E i ai lava le upu, e i ai le taimi e asa ai le faiva, e le atoa foi i'a i le liu o vaa, a o le natura lea o lo o outou soifua ma lou ola, e tatou te aoina mai mea lelei, i le taimi e tatou te faia ai ni faaiuga, e toe aoao mai

ia i tatou i lo tatou ola tauivi ma le ola e naunau ia fai mea lelei mo o tatou tagata.

Le tapuaiga a le Faamasino Sili, le Peresetene o le Faamasinoga, alii ma tamaitai Faamasino. E pei ua ala ona ou taua le vaega lea lau Afioga i le Fofoga Fetalai, leaga e tasi lava le pou lea e le lua ni pou. Leaga o lea e maua pea lava i le faalogo e faapea ua i ai se pou e faaopoopo, e leai. Lau Afioga i le Faamasino Sili, le Peresetene, alii ma tamaitai o le Faamasinoga, faamalo le galulue, faamalo le tautua. O matou e faia Tulafono, a o outou e faaliliuina ma faatinoina le amiotonu.

E le faagaloina ia te au le tapuaiga a Taitai o Ekalesia, le aufaigaluega totofi o le Talalelei. A, se ua outou gapatia, noonooia, faafaletuluia ona o lo outou naunau ia maua e Samoa le ola e faavavau. O le tuualalo a le sui usufono o Palauli le Falefa, ia sao uma Samoa i le ola e faavavau. Sa lauga foi le sui usufono mo Anoamaa Sasae, ia tatou maua le loto e faamagalo. E faafefea ona tatou maua le loto e faamagalo? O le tagata ua na taliaina le faaolataga, e avea ai Iesu Keriso o le Alii ma le Faaola.

Lau Afioga i le Fofoga Fetalai, e le mafai ona ou alulua, leaga e faigata le tapuaiga i le Tutafaitoa o le usoga a Pule ma Tumua, Ituaui ma Alataua, Aiga i le Tai ma le Vaa o Fonoti. Samoa, o lau tapuaiga ma au talosaga ua manuia ai lau Palemene. Talofa i lau tapuaiga, e ala ona ou... lau Afioga i le Fofoga Fetalai, leaga e tasi lea mataupu e masani ona ou laga i le Fono a le Palemene. Ou te talanoa ai foi i Matagaluega, Faalapotopotoga, le naunau e aumai i luga le tagata vaivai lona tamaoaiga. O le mafuaaga lena o le tatou omai iinei, ou te iloa foi lau Afioga i le Fofoga Fetalai, e tasi le isi lea o molimau ola, o le atinae mai le leai o se mea. Ae ua a nei? A lea ua faamanuia le Atua, ua faamanuia le Atua. So o se tagata lava e faamaoni lona loto i le Atua, e faulai le tamaoaiga. E pei lava foi ona ou taua i le mea lea na ou faalauina ina ua tatou vaavaai atu i o tatou uso ma se tai o tuafafine e le o alaala mai. Afai lava o le tulaga lea e i ai, tatou tatalo e faamagalo. La e fai mai Iesu, “A e alofa atu i le tagata e alofa mai, o le a se tau e te maua? E leai se mea. A o lou alofa atu i le tagata e ita mai ia te oe, ma fai oe ma o latou fili, a... e faulai le alofa o le Atua.” Ua ala ona ou faia nei mea Samoa o lau tapuaiga, e leaga na ala ona matou omai iinei, ia aumai i luga le tagata limavaivai ia maua ni mea i ona lima.

E le faagaloina le taputapu mai o nai o tatou uso i le Faigamalo a Tutuila ma Manua. Lau Afioga i le Kovana Sili ma le Lutena Kovana ma la oulua tapuaiga, malo le tapuai, malo le tatalo mai. Lau Afioga i le Peresetene o le Maota o sui, e faapea foi le Fofoga Fetalai o le Senate, aemaise le mamalu o usufono o Maota e Lua o lau Faigamalo Tutuila ma Manua. O le paia lava lea i le Faleagafulu, i Tama na autasi ma le Tama na faasau ai Sua ma le Vaifanua, Fofu ma Aitulagi, Saole ma Saleaamua ma le Launiu na Saelua. Le paia i le Motusa, aua le Tama a le Manuatele le Laau na Amotasi ma

Faatuiolemotu, faapea foi le mamalu i le Auvaa o Tootoo. O paia na o Samoa, ua aofia mai i Tiafau nei i Malae o le Faautugatagi a Samoa.

Sa ou mafaufau ou te talanoa i taeao o le atunuu, leaga a tautala Tiatia i taeao o le atunuu, leaga e i ai le taeao o Tiatia ma Salemuliaga. O le taeao na faana ai tama, ae ou te le toe taua mea ia, leaga o taeao o le Talalelei. O taeao o le Talalelei, Mataniu Feagaimaleata. Ae a Malaeola ma Gafoga, Faleu ma Utuagiagi. E i ai le taeao lea ou te le o vaai o tusi i lalo, ae sa tatau ona tusi i lalo, o le taeao na taunuu ai le Metotisi i Satupaitea i le malae o Asiata ae o le 1825, e 5 tausaga na muamua ai taunuu le matou Ekalesia i laufanua o Faletoi. Ae ui o lea, e le taua ia le mea... ae taua le oo mai o le Talalelei. Ou te iloa i totonu o lenei Maota, se ua faatalaleleiina uma lava afioga ma tamaitai faipule. E toatasi le tagata ou te iloa e fealuai ma le Tusi Paia ae le ola ai. Ia ou te le ola faamasino, aua o lea na ou fai atu po o le a le auala na oti ai Ieremia, ae fai mai na valaaulia e le Atua. Ae ese le auala na maliu ai ia... ae ui o lea...

**Afioga Peseta Vaifou Tevagaena (Faasaelelaga Nu.4):** Lau Afioga i le Fofoga Fetalai...

**FOFOGA FETALAI:** Ia se i tulai mai le sui usufono mo Faasaleleaga Nu 4.

**Afioga Peseta Vaifou Tevagaena:** Faafetai lava i le saunoaga a si ou uso a sui usufono le Afioga ia Faumui. Ona o lea ua tele taeao ia ua ou faalogo atu ai, ae o lea e galo le isi taeao faitaulia o le atunuu, Malaeola ma Gafoga. A o le tulaga foi lea e saunoa i ai i le mea na mafua ai ona oti Ieremia, e te silafia foi e pau lava le tagata na te faaotia uma le lalolagi, e na o le Atua. Ioe, e pei lava ona ou fai atu, o Ia na te aumaia o Ia foi na te toe faafoiina. Ma lou faaaloalo lava lau Afioga i le Fofoga Fetalai.

**FOFOGA FETALAI:** Ia se i tau mai le...

**Afioga Sulamanaia Fetaiai Tauiliili Tuivasa:** O le sui o lo o saunoa nei, o se tama lelei o lenei foi itumalo. Ae leaga o lea ua saunoa le sui usufono i taeao o le Tala Lelei. Ia o lea e galo i le sui usufono lenei, le Niniva ma Punialavaa, Fatutolo ma Pilioua ma Falepoiva, sa taunuu i ai le Ekalesia Mamona. E pei la o le agaga lena e ao ona faailoa, leaga o lea o le a galo i le sui usufono o lo o saunoa nei, a o la e faalogologo le... O le Ekalesia lenei, e pau lenei o le Ekalesia i Samoa e alolofa i le tatou atunuu. E tele o mea e aumai e fesoasoani i lenei Faigamalo a o lea o le a galo i le lauga a le sui sinia o lenei Maota. Ma lou agaga faaaloalo lau Afioga i le Fofoga Fetalai.

**FOFOGA FETALAI:** Ma ou te le toe talia se isi sui usufono e tulai mai, leaga o lea uma taeao i le taeao lea e saunoa i ai le sui usufono o Vaimauga, le Afioga ia Sulamanaia. O le taeao lena... E manatua foi manu o tatou i ai i le vaiiliu lea, na taunuu sologalelei taeao uma na, ona o le taeao lea sa i Fasitoo-uta o le taeao o Lepisi. Ae ou te musu e soona faamatala atu...

**Afioga Nafaitoa Talaimanu Ketu (Gagaemauga Nu.3):** Lau Afioga i le Fofoga Fetalai, pe maua se avanoa...

**FOFOGA FETALAI:** Se onosai o taua e ana le Tulafono. O le a ui lava faapea o lau tama oe ona... Ia ae o le taeao lena na toai taunuu malie ai le saogalemu taeao uma o le Tala Lelei o le taeao nai Lepisi i Fasitoo-uta. O le taeao lena na fesili ai misionare na taunuu mai, o le a le mea e pupusa mai ai uta. Ua fai telea Fasitoo-uta ona o le tama o Tamafaiga. O... se ua laki la, o lea la lea na taunuu ai loa. O le mea lea, ae ou te musu e faamatala tele ne i outou atamamai.

Ae se i tuu atu lava le avanoa i le sui Fofoga Fetalai.

**Afioga Nafaitoa Talaimanu Ketu:** Faafetai i lau Afioga i le Fofoga Fetalai ua e tepa i lou itu taumatau. E na ona faamanatu i le sui usufono o lo o saunoa, ou te le fia faalavelave lava, ae laga ua e taua taeao a o lea ou te nofonofu. O le mea la lea, Tiatia ua galo ia oe Fagamalo ma le mea e sau ai i Faleavao. Ona i ai lea o le manatu, e tasi lea taeao o lena e galo i lau Susuga Tiatia, le taeao na liliu ai le Tusi Paia i le Gagana Samoa.

**FOFOGA FETALAI:** E mulimuli nei la lena.

**Afioga Nafaitoa Talaimanu Ketu:** A na leai le taeao lea lau Afioga i le Fofoga Fetalai, e le lauvivilu le atunuu ma iloa faauiga uiga o upu ma Mataupu silisili o le Tusi Paia. E na o le 2 lava maa faamanatu tetele pe a e malaga i Salafai, e na o le maa i Sapapalii ma le maa la e i Avao. O la e tu ai lava i luma o le falesa. Ma le faaaloalo.

**Afioga Fuimaono Teo Samuelu Teo (Falealili Sasae):** Lau Afioga i le Fofoga Fetalai, sina avanoa laititi lava.

**FOFOGA FETALAI:** Ua muta ai foi i i, se malie lau Afioga i le sui usufono mo Falealili,

**Afioga Fuimaono Teo Samuelu Teo:** O le faamautuina lava o le saunoaga a le sui usufono mo Vaimauga. Aua a faitau foi i tatou faamaumauga, e leai lava ma se sui usufono na taua le taeao lea. E oo lava i le sui o Vaimauga na te le i taua le taeao taua lea, a o lea ua taua i le taeao lena. Faafetai lava aua



o le taeao sili lea. O le taeao lea na malama ai Samoa i le Talalelei, lea na aumai isi Talalelei o Ekalesia e teuteu ala. A o le taeao sili lea i Niniva ma Punialavaa, Faletolu ma Pilioua ma Falepouiva lea e mautu ai, na malama ai Samoa, ua fiafia ai le ositaulaga. Ma le agaga faaaloalo.

**FOFOGA FETALAI:** Ua a la, o lea ua manino auofala. Malie, a e afio mai i Tumua e Falefa ia oe Tumua. E po o fea lava le taeao o lou taeao lena Asiata. Ia se i tulai mai le Minisita o Pisinisi Alamanuia ma Leipa.

**Afioga Hon Lautafi Fio Selafi Purcell:** Ou te faafetai i lou uso ia Faumui ma te galulue faatasi lava i galuega a o matou itumalo. A o lea ua na fofola mai taeao o le Tala Lelei. Ua iloa foi e taua lava le taeao muamua, o lea la ua saunoa le sui usufono i le taeao lea na taunuu ai le lotu Toga, le lotu Metotisi. O le mau lava lenei a Satupaitea, o le 1828 taunuu le lotu i Satupaitea. E omai la le isi vaega lea, ua aoao uma tagata Satupaitea o la ua feoi ma Tusi Paia. E faatoa omai lea e 8 tausaga mulimuli ane, toe tau toe faaleleia atili, ae o le taeao muamua lava lea, la e i o i Faletoi, na taunuu ai le Lotu Toga. O le mea sili lea ua iloa e si ou uso o Faumui, pe te leai lava sau galuega e toe fai i le ta falemai ua lava lou sao lea, o lea ua e faalauiloa le taeao muamua o Satupaitea. Faafetai le faaaloalo.

**FOFOGA FETALAI:** Tatou see ese ma lea mea, aua e sao uma lava tatou. Tulai mai le Palemia pe ese foi sona finagalo.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi:** E leai, e leai se manatu e faaalua. E na o le pau lava le mea, ua tatou talanoa i taeao, o taeao na amata ai mea uma. A o lea lava e manino upu o le Tusi Paia, e sili atu le taeao na e oti ai na i lo le taeao na e fanau ai. O lea la sa ou fia faalogo, po o le a le mea na oti ai Ieremia. O le mea sa ou fia faalogo i ai, aua o lea ua tau mai, e 2 maa. O lea na saunoa mai ai le Sui Fofoga Fetalai. E le 2 alii ni maa, e 3 maa, a o le maa lava lea e pitosili ona taua, lea e oo mai nei lava, o le lauga lava tau mai le mea na oti ai Koliata. Pau lava lena o le maa e taua. A o lea e tusi foi i lalo, e tusi faasapasapa, o le mea la lea na ou faitioina ai i latou na faaliliuina le Tusi Paia. O le mea moni lava na oti ai Koliata, na togi e Tavita i le maa, se i vaai i le faigofie.

**FOFOGA FETALAI:** E sao foi le Palemia ia, malo faafetai. Faatea loa lea vaega, aua le vave taua le mea na maliu ai Ieremia ne i te i ua iloa e Peseta.

**Afioga Hon FAUMUINA TIATIA FAAOLATANE LIUGA:** O lea tatou te pisa i taeao, ae tasi lava le taeao na tau e le Tusi Paia o le taeao. O

le taeao na alu atu ai Maria i le tuugamau e avatu teu fugalaau, ae fai mai e a? Ua toe tu le Alii, o le taeao sili lena. Ae a silasila lenei Maota ma le faafofoga mai a Samoa. O aso a le Atua e leai ni taeao, e amata i le afiafi ona oo lea i le taeao. O le faalavelave lea e le momoe ai tagata leaga e amata i le taeao ae uma i le afiafi ae leai se po. A outou silasila i le Kenese lena e fai mai, o le afiafi ma le taeao, tasi le aso. O lona uiga lau Afioga, o le mea lena e ala ai ona uumi aso a le Atua, leaga e 24 itula. O le aso o le tagata e amata i le taeao, ae uma i le 6 i le afiafi, o lona uiga e leai se po.

E sili ona ou oo i si ou itumalo o la e faatalitali mai.

**FOFOGA FETALAI:** Ioe, o lea e silafia uma e isi sui usufono ia mea...

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui:** Lau Afioga i le Fofoga Fetalai, ua leva ona ou fia fautuina le lafo, ua lava le lauga a le sui usufono. A na i i nei Laauli, o... o le matua vevesi i i i le upu lea. E leaga na lauga Laauli, ua umi tele le po o taeao, o lea ua oo i le taeao o la e po. Ae se i ou tali atu i ai i se taimi.

**FOFOGA FETALAI:** Ia malo, oo ia i si ou itumalo, o la e faafogafoga mai.

**Afioga Hon FAUMUINA TIATIA FAAOLATANE LIUGA:** O si ou itumalo e pele i lou loto, faafetai mo le tapuaiga, e le faagaloina lau tapuaiga. Le afifio o Aiga Salevalasi, susu oe le Laulu o le alii nofo ao. Alaalatai lau Fetalaiga Tiatia o oe o le ituala mavae. Alaalatai lo oulua vaa seelua Togi ai ma Faalaa, Falevalu ma Salemuliaga. Susu oe Le Tagaloa o le Papa, Eetai Aiga Sa Amituanai, susu le Gafa lau faautautaga Safune ma Taulauniu e te tausi malu i ou tapaau. Susu le Faasuaiau o oe o le Tapaau, eetai oulua suafa Ili ma Tagoai, eetai le paia ia te oe le Aloalii, afifio foi le Aiga Sa Tagaileono ma lo outou Matua, alaalatai oe Satala ma lau Fetalaiga Leaumau. Susu lau Susuga Leulupoao, o oe o le alii nofo ao. Afifio Silafau ma Faumuina o ou Tapaau, susu le Tamaitai. Lau Fetalaiga Mauisiisii ma le paia ia Sauluitoga.

E le mafai ona ou faagaloina si ou nuu pele o Tafua, afifio Taufaaasisina ma Alaala Matuatala. Alaalatai Ulu ma Lemaota o oulua o Matua e tua i ai Tapaau. Alaalatai le paia i le Toiloto, faamalo i le tapuaiga.

E le faagaloina foi le tapuaiga a nai ou matua faale-agaga, le aufaigaluega tofofi a le Atua i le susu o le Toeaina Faatonu lau Susuga Leaso Tupai ma le tina ia Faafetai, o le paia maualuga i le nofo a faafeagaiga taulagi i si ou itumalo. Faamalo le tatalo, faamalo le tapuai.

E le o po se lilo, o Palauli le Falefa o lou aiga na ou ola ae ai ma fealuai ai, e leai se vaipanoa ou te le i alu ai. E toetiiti foi leai ni niu ou te le i ae ai, ou te iloa a na o le taimi lea na fai ai tuuga ae a o ou talavou. E leai se isi e tu ia

te au i le aeae, ona o le naunau ina ia tele ni popo e faaputu e fai ai salimata e fesoasoani i mea e fai a le nuu, ma mea fai a le Ekalesia ma tau sue ai sou pili. E manatua ai le saafiafiga a le tama Eperu, i le taimi lea sa ou i ai i Iraq, e masani ona ou alu i auvai o le vaitafe o le Eufirate, ma le aai tele o Papelonua ua goto i lalo. Na ou vaavaai ai ma ou manatua le pese lea a le tama Eperu lea e faapea mai. E maua i ina i le Salamo e 137. Fai mai, Ierusalem e, afai e galo oe ia te au, ia galo lava i lou lima taumatau. Afai ou te le manatua oe, ia pipii ae lou laulaufaiva i lou gutu pe afai ou te le faasili oe Ierusalem i mea ou te fiafia i ai. A aveese la Ierusalem, tuu i ai Palauli le Falefa, o la e fai mai le faaupuga mulimuli. Pe afai ou te le faasili oe i mea uma ou te fiafia i ai. O lona uiga e numera tasi lava lou itumalo ia te au. Aisea? O au o le tagata o le itumalo. O le mea foi lena ou te matai uma ai lava i nuu o lou itumalo, e leaga o au e 100% le toto i totonu o Palauli le Falefa.

**FOFOGA FETALAI:** Malo, o le tama o le eleele...

**Afioga Hon FAUMUINA TIATIA FAAOLATANE LIUGA:** Ioe, e le se futu tafea. Si ou itumalo, o lau faafetai, faafetai i lau faaeaea, faafetai i lau faaaloalo, faafetai i le matupalapala ua e aumai. Ou te le asoaina i lou ulu ne i lelea, ou te le asoaina foi i lou ua ne i motu i se tagata tau faasese. Ae teu i le va o lou fatu ma lou mama, ia ou alu lava ma au i le eleele pe afai e valaau le Atua ia te au. Palauli le Falefa, o moomooga na mo lo tatou itumalo. Ia faalogologo i le musumusuga a le Agaga Paia, e taitaiina oe i lau filifiliga o se sui e te manuia ai. Na ou manatua i le taimi na ou sau ai o fai faiga palota, a o vevesi foi le 2001. Ou te alu atu ia Tuilaepa ae fai mai, “Sole o le a e alu i lenei mea na o le mativa le mea e maua ai. Alu e fai lau galuega na e tele ai au tupe.” A o lau tuualalo i le Toeaina, “O le a le aoga e tele ai au tupe, a ou sau ae le manatua au e se isi.” E pei lava o le tala a Mose na fai ina ua alu ese ma Aikupito, sau e matitiva faatasi ma ona tagata e manuia ai. O le faamoemoe lena, ina ia manuia tagata e faalagolago ia te oe. Aua afai e manuia se tasi, se toa-lua se toa-tolu ona o oe, a! e te alu fiafia pe a valaau mai le Atua ia te oe. Faafetai...

**FOFOGA FETALA:** Ia malie le sui usufono se i tulai mai le Palemia.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielelegaoi:** E saolele lava le saunoaga a le sui usufono. Ma o tagata uma lava e omai ia te au, ou te muamua tuu i ai le lui lena, ona ou faalogo lea i le tali. Ona e i ai isi e o mai i taaiga, ma nofo sauni e te mativa. A o le ala lena ou te luiina ai le tagata, e aoga mo le faafogafoga mai, e te le sau i totonu i i e sue ai ni ou manuia. E te sau e sue manuia mo lou itumalo. O au la, e toatele lava tagata e o mai, ona ou tuia loa

lea i fesili ia. E i ai la le isi o lou itumalo na sau, e fia alu. Ona ou tuia foi lea i fesili. Fai mai o la ou te ola i lou togafai. Na o le togafai? Ioe. O le tali e te le mafaia le tofi. O le a nisi mea, e fai sou aiga? Ioe. E toa fia lau fanau? Pe toa-tolu ea na ia tau maia. O le a le matutua? O le matua e 13. O outou nonofo ma lou toalua? Leai o la e i Niu Sila. Ma lau fanau? I. Ua tiai Niu Sila ae sau e fia alu i le tofi, ona le tautala loa lea.

Ia ona fai loa lea o lau fautuaga, o lau fautuaga ia te oe, foi i Niu Sila. Alu i Niu Sila e tausi lelei lou toalua ma lau fanau. Se i aoga ua uma aoga, o le taimi lena faatoa e foi mai loa, ae o le taimi lenei, o lou tiute muamua lava, o le tausi o lou toalua ma lau fanau. Ae le o le tiai i Niu Sila ae sau, ua le faia lou tiute. O le alu atu lava lena, na alu atu ai lava, ma ou faalogo o lou fili numera muamua lena.

O lea la e oo mai nei o taumafai lava, e le i pai lava i se tofi. E le i pai lava i se tofi, ma e ou te le vavalo foi, e le pai foi i se tofi o la foi e alu lava i le taimi lenei, a ua alu ifo lava le toeaina ona o le lē usitai. O le tasi la lea sui, e tau mai loa mea uma ia ma ou fai atu, o le a e nofo... o le a e sau e te alu, ae o la e tele le galuega o lo o e i ai ma tau ai le Malo lenei o Samoa ma tau ai tagata Samoa, ae ou vaai atu, leai ua faaululito lava le manatu, e nofo i inei ae o lea e sau e malolo. Toeitiiti lava lavea i le tatou Tulafono foi lea, na matua ou tu ai i luma o le Faamasinoga e fai le molimau o le sui ua filifilia.

Lau Afioga i le Fofoga Fetalai, ia o le tulaga lena e taua tele le taeao nei, ina ne i te i ua faauiga sese a... e sese lau faamasinoga, ae o le matua sao lele o lau faamasinoga sa fai. Ia o ou mama na.

**FOFOGA FETALAI:** Malo, faafetai. Ia faaauau le saunoaga a le sui usufono.

**Afioga Hon FAUMUINA TIATIA FAAOLATANE LIUGA:** Faafetai i lau Afioga i le Fofoga Fetalai, ou faafetai foi i le Afioga i le Palemia e pei ona saunoa ai.

Ia o le vaega lea o le a ou oo ai o lau faafetai i galuega faatino mo si ou itumalo po o lo o faagasolo. O le toe faaleleia lea o le vai tumaoti i le matou nuu o Sili ma le matou nuu o Gautavai, lea na faaaluina ai e le Malo ia se tupe tele e \$1,200,000. Ia o le viliina o le vai ma fausia le tane vai mo si ou nuu o Gataivai ma paipa fou e faagasolo. O lo o faaauau lena galuega i lenei taimi.

O lea foi ou te faafetai ai ua ou vaai i le faaiuga a le Kapeneta, ua faataatia ai le \$1.8 miliona e faaauau ai le fausia o le vai lea. Ou te faafetai atu ai i le Malo i la outou faasoa. Ia e aoga nei mea uma aua le soifua laulelei o o tatou tagata.

O le toe faaleleia o le aualatele, o le Malo i le va o lou nuu o Puleia ma Gautavai Uta. O la e faagasolo ia fuafuaga o lea... toe faaleleia o le aualatele o le Malo, i le va o Vaiala Gautavai ma le aai tuai o Sili. O le auala galue o

lo o faagasolo nei, faafetai atu i le Minisita o Galuega faapea foi le Pule o le LTA, ia ma le Kapeneta i faaiuga foi ua toe filifili ai se tasi o Konekarate, e faaumaina ia le matou galuega.

Lau Afioga Papalii se i e silasila i ai na telefoni mai nei nai toeiaina, e na o le 600 mita lea na o atu le Kamupani fou lea fai, ia ma tau ai i toeiaina, e na o le 2 kilomita le auala. Ia na e saunoa mai foi e 3 kilomita ia ma toe faaauau ai i le Nofoaiga o le a sosoo nei pe a maea le tatou Tala i le Tupe 2021/2022. E faafetaia ai i le galuega lea, i lau Afioga i le Minisita o Galuega Tetele, ia aemaise foi o isi matafaioi o lo o feagai ma lau Afioga.

O isi atinae e a foi lea... o lea e fai e i ai manuia o le itumalo, faafetai atu i le Malo aemaise o le Matagaluega o le Soifua Maloloina, i le fausiaina o le matou falemai. O lea na pei e faafogoga ia le tatou Maota nei aemaise o Samoa o faafogafoga mai, ia o le falemai lea e matou te galulue faatasi ai ma le Afioga i le Minisita ia Lautafi ia faapea foi le Minisita Lagolago le Afioga ia Tuifaasisina Misa Lisati.

O leni faamoemoe ina ia tuu tuu mai ia le femalagaai o tagata o matou itumalo, ia aua ai ne i toe o i Tuasivi, a ia aumai ia fomai, o teine fomai ia ma mea o le a fai ai i i. O lea la e galulue foi le Afioga ia Tuifaasisina ma nisi foi o le afaigaluega i le tau faavasegaina o le matou pa e siomia ai le falemai lea.

O lo o i ai foi le faamoemoe e faia se falemalii i le falemai i Satupaitea, ina ia taofia ai le malaga mamao atu i le Faasaleleaga, mo ia foi tuatuagia. E le o se faamoemoe ia tele ia ni tagata feoti, ae sauniuni ia taugofie mo i latou o le a afaina pe aafia i nei fuafuaga uma.

O isi faaiuga a le Malo ua uma ona saunoa foi i ai le Afioga i le Palemia, o le siitia mai o le Ofisa o Faamasinoga mai Tuasivi i le taulaga fou i Salelologa. Faafetai tele i le vaega lea, o le a faapena foi ona taugofie ma faigofie ma laitiiti le taimi e alu ai, i nai o tatou tagata o faaogaina nei auaunaga a le Malo pe a maea ona fai. O lea ua o matou vaavaai atu i le Tala o le Tupe, ia o lo o faatupeina ia vaega i le Tala o le Tupe ma auuai ai ni vaega totote, i Tala o le Tupe e mulimuli mai.

O le siitia mai o le Ofisa Tutotonu o Leoleo mai i Tuasivi i le taulaga i Salelologa. E moi lava o la ua i ai ia mo mea o outposts foi lea a Leoleo o lea foi e i ai le isi vaega i Vaitoomuli i Palauli, ae e manaia lava le oo mai pea i i o le Ofisa lea Tutotonu o Leoleo, ia e autovaa mai i ai tagata e latou te faaogaina le Taulaga i Salelologa.

Lau Afioga i le Fofoga Fetalai o vaega ia lea e maua ai ia faamanuiaga o le matou itumalo. O le isi vaega lau Afioga e le mafai ona faaitiitia le agaga faafetai i le Malo i le Afioga i le Palemia ma le Kapeneta, ia aemaise lau Afioga i le Fofoga Fetalai ma leni Palemene, i le tofiaina o au, e avea ma Sui o le Palemene a Samoa i Vaega Faa-Palemene Faava-o-Malo. Aferika, atunuu o Aferika, atunuu Karipeane, ma le Pasefika. O lea Palemene, e 79 ia atunuu e i ai. Ia, e le gata i lea, ua tofia ai ia au nei, e le gata o le Pasefika

ae o isi atunuu e pei o Aferika ma le Karipeane, e avea ma Peresetene o le ACP.

O lea la, tusa o au o le Fofoga Fetalai o le Palemene lea. O le mea foi la lene aua e i ai foi lau Tulafono Tumau, e tau la e matou le Tulafono lea, o le Rules of Procedures. E faatonutonu ai le faalogotata o sui usufono o lenei Palemene. Ae o le tuufaatasiga foi la o Palemene e 2, le European Human Parliament ia ma le ACP Parliament, lea e ma te Fofoga Fetalai Soofaatasi ma le isi foi tamalii mai i Potukale, Portugal.

Ou te faafetai ai i le faaeaea i si ou itumalo, ia ua avea ai au nei ma o tatou sui, ia ma o lea ua ou tau faafoeina ai le Fono Faa-Palemene Faava-o-Malo i atunuu o le Karipeane, Aferika ia ma le Pasefika. O le faaeaea lea lau Afioga... ae e le o se mea fou ia au, e i ai foi isi Faalapotopotoga Faava-o-Malo, ia sa ou Taitaifono ai foi. E pei la o le isi faataitaiga, Council of Ministers a o avea au ma Minisita o Tupe. Sa ou Taitaifono ai i le Fono lea e 40 ma ona tupu Minisita o atunuu laiti, ia ma e le fou ia au lenei... ou te faafetai ai i le Malo, i le faaeaea ua tuuina mai i si ou itumalo, ia ae faapena lava le Alii, i le tulaga o i ai.

Ia ma o matafaioi la lene... lea ua... ou te iloa lea ua ready nei le tatou Feagaiga lea ua uma ona saunia, ma e avea foi lau faafetai e le gata o le tatou Malo, le Matagaluega o le Foreign Affairs, ia ae sili ai le tamalii o lo o avea ma tatou Amepasa, aua o le Afioga ia Fatumanava, o ia o se tasi o Chief Negotiators o le tatou Feagaiga fou lea o le a tuuina mai e saina pe a faapea e maea le lockdown o le lalolagi i tulaga faa... o i ai nei le faamai o le Koviti. Ia ma o lo o i ai pea le faamoemoe, o le tulaga e pei ona i ai, i le vaega lea, aua na taumafai foi lava ia atunuu Europe e tau break up ia le ACP, ona o le malosi tele o le finau a le tatou toatele i le latou toaitiiti. Ia ae o lea lava ua toe faatulaga le JPA, i totonu o le Feagaiga Fou.

Ia ona ou oo mai lea lau Afioga i tulaga o le toe tilotilo aua o lea e tele ina saunoa le Afioga i le Palemia i le amata mai o le tulaga lea ina ua take over ia le HRPP i le taitaiina o le Malo, ia ma avatu le... Ou te toe tomanatu ai i galuega tetele ma matatia na ausia e le tatou Faigamalo i le taimi faatoa ou sau ai au. Na mafai ai ona toe faatulaga ia le Matagaluega o Galuega, ia ma... ua le gata ina faasaoina ai ia le tele o tupe... tusa o tupe sa faasaoina i le tuufaatasiga o le faatulagaina o le Matagaluega o Galuega, e \$20 miliona i le tausaga. O mea la... tusa o tupe faasao na, tele kamupani ua faavaeina.

I le taimi sa toe fai ai le faatulagana lea, e 2 Kamupani sa o latou... 3 i le Vaega lea o le PWD. Ia ma le vaega lea a le Ott Transport, ia ma le vaega lea o le Westerlund Transport. E pei na pau lene, ae o le taimi lenei, ua ova i le 20. O le mea la ua aliali mai lau Afioga, o le faatupulaia o galuega. I le taimi na faaitiitia ai le Matagaluega, sa 400 toetiiti lava 500. I le taimi lenei i Kamupani nei ua faateleina, ua ova i le 3,000 avanoa o galuega ua maua ai. Ae o le mea e sili ona taua, ua tele galuega ua maua ai, ma ua tele le agai

i luma o galuega, i le tulaga lea o le faaleleia o auala, faaleleia o alavai, ia faapena foi ma le tele o isi vaega ua tele ai tatou faatinoga o galuega.

O le isi mea ua ou tilotilo i ai, i lau toe tilotilo atu i le... o le faatuina lea o le masini faamama toto. Ae ou te manatua ai si ou uso ia Mulitalo, ia ou te iloa foi o lenei Palemene sa ave ai le tittle lea ia Mulitalo o le Fomai, Dr.Mulitalo. Ia ma e ou te manatua ai o le taimi lenei, i le taimi na faatu ai i, pe a i le toa 7 i le toa 8 tagata sa faamama toto, ae sa i Niu Sila. Ae o le taimi lenei, ua ova i le 135 po o le 136 i latou ua faamama toto. O lona uiga e tau mai i i, o lea e agai i luma le manaomia o le fesoasoani a le Malo, ina ia faaumiumi le soifua o nai o tatou tagata, o lo o ua mumusu e feoti. Ia ae e le afaina lea aua e le...

I le 2003 i le 2007, e tasi lea matatia na ou tilotilo i ai, o le fausia o fale taaalo ma malae taaalo i taligamalo a Samoa. Ia na i ai foi le aufai nusipepa na fai a latou faasalalauga, fai mai e tatau ona tuli au.

**Afioga Salausa John Ah Ching:** Lau Afioga i le Fofoga Fetalai...

**FOFOGA FETALAI:** Ia, malie le sui usufono o Palauli le Falefa, se i tulai mai le sui usufono o Faleata i Sasae...

**Afioga Salausa John Ah Ching:** Faafetai mo le avanoa, e le o fia faalavelave i le saunoaga matagofie a le Susuga i le sui usufono, a ua taua ia le mea e fia faamalamalama atili i le faamamaina o toto o tagata soifua leaga o lea e pei e faapea a toatele ua lelei, ma ua manaomia le auaunaga.

O le tulaga lea faamama toto, e tatau ona tatou taumafai e faapalasi i lalo, aua a palasi i lalo, o le lelei lena mo le soifua maloloina o le atunuu, ma o le lelei foi lena e le tele ai ni tupe e toe alu. Ae o le faapalasi la i lalo, o lona uiga o le ola puipuia, mai i le tulaga lea o le toto maualuga ma le mai suka. A faapau la i lalo le mai suka ma le toto maualuga, ona palasi lea i lalo le manaomia o le faamamaina o le toto.

E pei o i ina la e tatau ona agai le tatou galuega i le puipuia o le toto maualuga ma le mai suka. E pei o si fesoasoani atu lea, faafetai mo le avanoa.

**FOFOGA FETALAI:** Malo, e pei o le saunoaga a le sui usufono, o auaunaga sa le mafai ona maua. A o le sao lea? Ia ae e lavea uma i totonu o atinae a le Malo. E pei o le tulaga lena. E pei sa o tatou i Niu Sila, o i Tutuila ona o le faamamaina o toto. Ia mai i le taimi lena, ia o lea na o tatou maua ai loa... tiga le taugata, ae sa taumafai lava le Malo ia maua lea auaunaga mo le lautele o le atunuu.

Ia sa fai o toa 7, ae fia lea ua i ai nei? Ia ua 100 ma ona tupu, ia e sao foi le fautuaga a le Fomai po o le sui usufono o Faleata, e tatau ona taofiofi ia aua ne i faatupulaia. Ia ae ona o lea auaunaga, ia semeamanu a na leai se auauanga a le Malo o fea o le a o ai lenei 100 ma ona tupu? E le taugofie, ae

o faafofoga mai ia le atunuu, e pei o le tulaga lena. Ia malo faafetai, ia se i tulai mai ia le sui usufono....

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui:** Lau Afioga i le Fofoga Fetalai se i faia se malologa a le sui usufono...

**FOFOGA FETALAI:** Ia se i saunoa mai le Palemia.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui:** E taua tele le mea lea ua oo i ai le faasologa, ae o le itu taua lava lea o le taofiofiga, taofiofiga lea ua saunoa i ai le Fomai le Afioga ia Salausa.

E i ai le taimi na ou tapolo ai, ou fesili ai i le fomai sa ma tapolo i le taimi na faatoa amata le tatou faamama toto. O le a tonu lava le mea e vave ai ona lavea le tagata i le faamama toto? Ae fai mai le tala a le fomai, o le maualuga faaaauu pea o le toto ae e leai se mea o faia i ai. O le taua la o le itu lea, aua o lea lava e tatou te talanoa, taofiofi o toto maualuga. Ia ma le tuu i lalo, e 2 lava mea sa taua, ae o le mea la e taua ia te au lea na talanoa mai ai le fomai, o le tuu i lalo o le toto maualuga. O lona uiga la e 2 lava mea, vaai o au taumafa ma le vaai o au fualaau, fualaau e tuu ai i lalo le toto maualuga.

O le itu lea faamama toto, o le matautia o le faamama toto i le taimi lena, o le lavea loa ona ave loa lea o oe i Niu Sila, e le mafai ona e toe sau. E matua nofomau ai, o lea la sa ave ai ia le toaina lea o Polataivao, ma umi ai lava ona nofo i Niu Sila. Ua le mafai ona toe sau, aua e 3 aso ma toe tui faamama foi le toto. O le mea moni lava, ua oo tatou i le tulaga mea lea sa tau atu le fuainumera. Ae matua maoae lava le mea na sasa ai tatou e Niu Sila i le tulaga tau tupe, o le mea lena e ova ma le \$5 miliona Niu Sila sa faamama ai le vaega lea. E toa 7, ae ua le toe mafai ona toe foi mai i Samoa, aua o le taimi e omai ai, ua iloa lelei lava, o le mea e oo i ai o le oti.

Ia o la sa taumafai ai lava le Malo e sue mai se ituaiga tautua faapea, ma e tele lava le galuega na fai. E tele lava le galuega na fai o le mea lena e manatua ai pea le Afioga i le Minisita le Fetalai ia Mulitalo, ona sa valaau faalavelave pea i ai faalavelave pea i ai, ona o lou manatu la i toelaiina nei aemaise lava Polataivao, ua toe fia foi mai i Samoa, e vaai i lona aiga. O lea la na faatu ai loa ia le tatou falemai, ma fai ai ma le polokalame la lea, e siaki ai ma tagata ua lalata, ma o le mea moi lava, e fai lava si feoloolo o tagata ua i le lisi faatalitali e le umi ae lavea i le faamama toto. Ua le gata la i Upolu, ae o la ua faatu foi le unit i Savaii.

O lona uiga o le tautua lena o lo o tupu pea lau Afioga i le Fofoga Fetalai, ae ou te faafetai i le Afioga i le sui usufono o lona laga o le mataupu ona o le tele o le mea lea ua tupu, ua mamai ai o tatou tagata ona o le soifuaga maloloina lea ua... o le soifuaga lea ua o tatou i ai, ua tele le ai mea lelei, ae



le lava le gaioi. O mea lelei la ia ma le tele o taumafa, ia o le mea lena e iu i ai, o le faamama toto.

Ma o lea e alu pea le afaina o tatou tagata i le faamama o latou toto. Ae o le taua lena o le faapooopo mai o le Susuga i le Fomai. Ia faataua le mea lenei o le taofiofiga o le toto maualuga, a e maua foi i le toto maualuga ia vaai au fualaau ina ia inu pea au fualaau e control ai lou toto maualuga. Ae fai foi ma sue, pe ua uma lou toto maualuga, pe leai, ina ne i te i ua e saga faia pea le mea lea, ae uma ua e oti atu ai foi, ua leva ona uma le toto maualuga ae la e tiau lava e au fualaau ou totoga.

O lona uiga, o le olaga lea e tatou te i ai, o le olaga o le faaeteete, e le taugofie mea ia, o le matua taugata. O le tasi lena tautua e pe i e faale o agai i ai le faataua e tagata ae o le taua lea o le toe laga o le mataupu lea, e leaga e matautia auala, e oo lava i fomai uma na i ai, na oo atu le tele fomai, aua le faia le mea lea i Samoa. O le tele ia o fomai na o atu ia te au, aua le fai le mea lea i Samoa, e le mafaia e Samoa ona faatino.

Tutuila \$40 miliona e faatino ai i tausaga uma tausaga uma ae pay mai e Uncle Sam, pay mai i Amerika. O lona uiga e sili atu i le \$100 miliona Samoa le tau, \$100 miliona ae o lea e posi posi lava e le falemai ma le Pulega ia seleni ina ia mafai ai ona togafiti tagata i inei. Ua le gata la i Upolu nei ae o lea foi ua faatu masini i Savaii, e taofia ai le malaga mamao mai o tatou tagata mai i Savaii.

**FOFOGA FETALAI:** Malo, faafetai. Ia malo faafetai i le sui usufono ua taua lea tulaga, ia ua toe faamanino atili ai lenei foi tautua a le atunuu, Malo i a latou atinae aua le soifua maloloina. Tulai mai le sui usufono.

**Afioga Hon FAUMUINA TIATIA FAAOLATANE LIUGA:** Faafetai i lau Afioga i le Fofoga Fetalai, faafetai foi i le Afioga i le Fomai aemaise o le Afioga i le Palemia. Ou te iloa o la e manaia tali, ae a na faapea e faaaoga e le Atua le mea lea o le fosi o le tagata, ia e leai ma se isi e amio valea. Aua o lau filifiliga e te oti ai, o lau filifiliga foi e te ola ai.

O le mea la lea e fai e le Malo, e ala ona ou manatua le mea lea, o le aitia a Mulitalo na alu ai aumai masini nei, na matua tagi lelei i luma o le Minisita o le Soifua Maloloina i Singapore. Se i vaai i ai, na matuai faaali ai i i le agavaa, ua leai ni tupe ae faaalu ona loimata na ala ai ona mafua ona sao mai masini nei.

Ae e sao lelei le Afioga i le Palemia, na matua tetee i ai le tele o fomai i le aumaiga o masini i Samoa nei. Ia vaai i le tagi a Mulitalo na sau ai lava ma le specialist pe 2 ea pe 3 tausaga e tau faa... ina ia mafai ona... O le mea lena e le mafai ona galo ia te au le tama nei. O le tele foi o taimi e ma te feupuai i luma o le Kapeneta, ae ou te matuai respect ina lenei tama ona o lona sao na fai.

Ae e pei la e taua mea ia na saunoa ai le Fomai, ae e tatau foi ona silafia, e le o i i o se fomai o lea e i i o le sui usufono. Ae sui usufono, e te alofa i tagata. O le a lau mea e fai ai pe a sau fai mai ua mai? Ia e lelei la ia e faalogo loa ua mai, ia na fai loa lea o le tulaga lena e ave i ai fualaa. Ae e pei o le ala lena na ou taua ai, o le taua o le sao o lenei uso, le Tofa ia Mulitalo i le galuega faa-uauna i le tautuaina o le atunuu.

O le 2003 i le 2007, na o tatou fausia ai faletetele ma malae taaalo. E pei lava na ou tau fai atu, na i ai foi iuleo na ou faalogo ai i tagata fai mai ua soona faaoga tupe, ae leiloa po o a mea e fai i nei fale ma nei malae taaalo o le a alu ai le miliona ma miliona o tupe. Ae na fai, na fai, ae fai mai, Tuilaepa tuli lau tama na e faatauga tupe. O le a le mea lea e tupu nei? O le a le mea lea e tupu nei? Atinae taaloga i totonu o Samoa.

Ou te faafetai foi ona ua Minisita se tasi o au Minisita Lagolago i aso ia, le Afioga i le Toetaufanua a le Malietoa le Afioga ia Loau, aua o matou nei sa o matou galulue faatasi i le fausiaina o fale taaalo ma malae taaalo nei. Ia o lea foi la ua alu atu ia toe faalelei atili, ua matua manaia lava. O le a le mea lea ua tupu? Ua tali malo faafia Samoa talu ai fale nei.

Ae o le mea manaia, na alu loa le malaga a Tui i Saina, na ou musumusu lea i le toeaina, pe mafai ona alu e fai i si Malo lea, e faamagalo nei aitalafu. Ia na faamagalo, e leai se mea na totogiina na faamagalo i le aisiga a lo tatou tama le Taitai o le atunuu. O le mea la lena o lea e fai ai lau tala i mea nei, o le taua ia o mea nei. O mea e tatou te faia, ia fai mo le lumanai. Ma e tautala pea galuega, galuega e sauni ai o outou alo ma fanau, ina ia mafai ona atinae lo latou lumanai, lumanai i taaloga, lumanai mo pulega, lumanai faataitai i le tulaga lea.

O le isi mea ou te manatua ona e tasi lea o mea o le faatuina o le SROS, le tatou Faalapotopotoga lea e a foi e... Suesuega Faasaienisi. O le tasi lea mea na ala ai ona mafua ona taumafai le Malo e ave ai alo ma fanau e aooga faasaienitisi, ona o le tulaga ina ia taumafai lava tatou e develop a tatou mea ia e maua i inei, ina ia mafai ai ona faatau atu i ni tau e lelei pe sui ai foi tatou oloa o lo o auina mai fafo.

O le time zone. O le taimi lea na sui ai, tasi lea mea ou te matuai faapalopaloa ai le aualii ia pe a matou fono i fono faava-o-Malo, fai atu, o lea e amanaia ma viia Amerika, o Rusia, o Saina e o i le masina a latou loketi ma o tutu ai. A o Samoa, o Samoa le atunuu mulimuli na vaai i le lagoto o le meleniuma lea na uma atu. E goto le la mulimuli ou te le o i inei o la ou te i fafo, ae ou te sau fai mai o le matua manaia, faapea a nei e faaletonu lena taimi ona o le masalosaloga o tagata i mea ia o computers a nei a jam le system. E ala ona ou taua le mea lea, ou fai atu, o Amerika, o Saina ma Rusia, tulaueleele i le masina, a o Samoa, matou nonofo sii mai le la i le itu i sisifo tuu i le itu i sasae. Fai mai, e a? Matou nonofo aumai le la mai sisifo tuu i sasae. Ia, o lea ua amata e tatou taimi, tusa o le taeao lea a tatou, a o le po lena i isi atunuu. O le faaitaiga; o lea e tu le la, o tatou e vaai muamua

i le la ae mulimuli vaai i ai Amerika Samoa. O Amerika Samoa i le taimi lenei, e 25 itula e eseese ai tatou ma Tutuila. O Niu Sila, e 1 le itula tatou te eseese ai, e ahead tatou i o. So o se mea lava o le lalolagi, e muamua tatou faigaluega iinei, ona ave lea o tatou galuega, tatou momoe ae oo atu i le taeao ua toe omai galuega ia tatou. O le atamai o lenei faaiuga. E pei e foliga e mama, ae leai. Na tau i ai foi nai feteenaiga, ae na manaia o le faiga o lena mea. Na o Samoa lava le atunuu na sii maia le la i sisifo tuu i sasae. O le mea la lena ou te fai atu ai i le au vaega lea le au Aferika ma le au... e laitiiti Samoa ae fai mea ofoofogia.

Suiga o le itu auala. O lau Afioga le isi tagata e to lou pulou. Ou te mafaufau loa i le suiga o le itu auala, Tuilaepa ma le Vaega Faaupufai, e le o se mea faigofie. E i ai le isi inisinia sa i totonu foi o lenei Palemene fai mai a le faalauteleina le auala e le tataua ona fai ni suiga o... a o le inisinia o le civil engineer na CEO i le Matagaluega o Galuega, fai mai, faalautele le auala. Ou fai atu o le a le mea e ala ai ona faalautele le auala? Fai mai, leaga e tataua ona e alu i le itu lea e tilotilo po o sau se taavale mai o. O le mea e sili ai, e to lou pulou Leapepe i lau sacrifice. Na e ositaulaga, tele foi isi tagata na ositaulaga. O le a le mea lea ua e silasila i ai? Faamanuia le Atua ia te oe, faamanuia le Atua ia Samoa. Na fai lava le suiga o le itu auala, e le atoa se 20,000 o taavale, e le atoa se 20,000. O le a le mea lea ua i ai nei? Private cars alone, o la ua 40,000, faaopoopo i ai taxi, faaopoopo i ai pasi, faaopoopo i ai rental cars, ua matua tumu taavale. Ia ae tau leai ni tagata o feoti, na o onana lava ia e o oso i le omo feoti. A o le mea lea na fai mai e 700 tagata feoti i le aso. Ou te le iloa po o fea e aumai ai nei mafaufauga. Ia, aua o le tasi lena mea na sui ai le Pati a le isi au vaega, faavalea e Leala ona o atu lea fai le latou Vaega ma tetee mai ai.

**FOFOGA FETALAI:** Ia, o Leala le isi sui usufono na tetee i le suiga o itu auala.

**Afioga Hon FAUMUINA TIATIA FAAOLATANE LIUGA:** Ioe. Lau Afioga i le Fofoga Fetalai, o le isi vaega o le suiga o le daylight savings. Ou te iloa ina o le itu lenei na nofo atu ai le isi sui usufono, si ou uso ia Asiata, fai mai ua nonofo le HRPP ma sui le taimi e tagi ai alisi, ma sui le taimi e vivini ai moa, ae le suia e se... e sui lava e le alisi lana tagi i le taimi e tataua ona tagi ai, e vivini foi le moa i le taimi e vivini ai. Leaga ua ala ona ou taua le vaega lea, leaga na saunoa i ai le isi sui usufono i le tatou Fono lenei fai mai e tataua ona silasila le Malo i le suiga o le taimi, le daylight savings. E le lagolagoina e lenei usugafono lena... a faapea aua o lea ua i ai foi faaiuga a le Malo ua fai, mo le faataitaiga; o le vaeluaina o le aoga itumalo po o le kolisi i le Itu Asau ma i le Alataua. O lea la ou te iloa pe taua foi e le Afioga i le Tamaitai sui usufono o lena itumalo pe a oo i le taimi e saunoa ai, ae

tatau foi ona silasila le Malo i vaega tonu ia e mamao ai le tausavali o tamaiti aoga, i le tulaga lava lea o le...

**FOFOGA FETALAI:** Malie lava le sui usufono mo Palauli le Falefa se i tulai mai le Taitai o le Malo.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui:** Lau Afioga i le Fofoga Fetalai, se i fai se malologa a le sui usufono sa Minisita foi i le taimi sa talanoa ai mataupu lenei. Ae sa i ai lou taofi ou te tali mulimuli atu ona ou talaina loa lea o le gafa o le mataupu lea leaga sa laga mai e le Afioga i le sui usufono mamalu mo Gagaifomauga Nu.3, e tatau ona toe silasila i ai le Malo. O le tulaga sao lava, o lea tatou te i ai i le taimi tuai i le taimi lenei, ae le i suia taimi mo le faasaoina o itula malamalama po o daylight savings. O lea la tatou te i ai i le taimi tonu lava lenei masani. O le a la le mea lea e tupu? O lea ua vave po, e oo lava i le taeao e tuai ona malamalama, a o lea foi ua agai atu lava ina suia ai foi taimi o afiafi. O lea tatou te i le taimi masani ae le i suia le tulaga lea e saunoa i ai le sui usufono. E sao le sui usufono.

O le mafuaaga, ona o lea lava e taavili le lalolagi, o le taaviliga o le afa o le tausaga e faasolosolo atu ai ua faasaga le taaviliga lea lalata i le la, ona alu lea o le isi 6 masina liliu ese le vaega lea, ua mamao mai le la. A e alu la i le itu i matu i atunuu ia o Norway, faatoa po lelei lava i le ta o le 12 i le po, ae i ai lava le malu afiafi foi lea, ae toe oso le la i le ta o le 3 i le vaveao. O le eseese lina na faatulaga ai aso i le taaviliga o le lalolagi, ma e 4 tau o le tausaga. E i ai le tau malulu winter, ona agai mai loa lea i le tau foi lea ua malulu vevela feoloolo ona sosoo mai loa lea e 3 masina foi, sosoo mai loa lea ma le taumafanafana, ona sosoo loa lea ma le taumafanafana feoloolo, ia ma agai atu ai loa i le tau malulu po o le tau e mamafa ai le aisa. E 4 la ia seasons. O lea la ua tatou i ai tonu i le taimi pe a faitau i le tau masani, o tatou na o le 2 lava tau, o le tau o timuga ma le tau o le vevela. A o lea la o le a ou talanoa atu ia Niu Sila, o Niu Sila e maati ai tau nei e 4 eseese, e tai 3 masina. O le taimi la lea, o lea ua agai atu Niu Sila i le tau malulu a o lea e i ai i le autumn, ona oo atu ai lea i le winter, ona faasolosolo ai lea i le spring, faasolosolo mai i le summer. O lea la ua tatou agai i le taimi o le autumn, ia ona amata loa lea oo atu po o Aperila, Me, Iuni, o tau la ia e matua maati ai le malulu, ma o le taimi foi la lea o le a atili ai ona pogisa, vave le aso. O lea la ua faatulaga ai i le fesuaiga o le tau, o le taimi tonu lava ua matua pogisa ai, toe fesuai loa lea o le taimi, tuu mai i tua, o lea la ua amata loa ona ai kia o le fesuaiga lea.

Sa ou manatu e malamalama i ai le sa i totonu o le Kapeneta. Ma o le tausaga lea na fesili ai foi le Sui Palemia ia te au po o le a le aoga o nei mea,

ia ona ou faamatala foi lea i ai. Ua leva ona i totonu, sa matou faia faatasi, ae oo mai lava o tau fesili.

A o le tali lena lau Afioga, o lea tatou te i ai i taimi masani e le i suia, seia oo i le taimi o Aperila, o le taimi lea ua amata ona vevela le malulu, o i ina la le taimi e toe sui mai ai loa. O lona uiga, o le taimi sa masani ona ta ai le 7 lea ua tuu mai i tua, ta le 6, ona vave ai lea ona malamalama ia ma fesoasoani ai loa i le mataupu lea. Ae manatua la, o le oo atu ia Iuni, Iulai, o le tauga vevela lena o le malulu i Niu Sila, a o le tau vevela foi lena o le malulu i Samoa, leaga o lea tatou te i le itu i saute o le Ekueta, e eseese tau. O le taimi e malulu ai tatou, a o le taimi lena e mafanafana ai atunuu e i luga atu o le Ekueta.

Lau Afioga i le Fofoga Fetalai, e lavelave le mataupu, a o le faalavelave o lea ua le nofo mai le na tau fesili ma le sa tau fesili foi, le toalua lea, lea e le nonofo mai se i ou faamalamalamaina atu le lavelave o mataupu ia.

Lau Afioga, o le tulaga lena, o lea ua agai malie atu lava tatou i le taimi e matua pogisa ai ma umi le pogisa i le taeao ona faatoa suia ai loa lea o le taimi i le amataga o Aperila, Me, Iuni, faasolosolo atu ia Iulai ma toe faasolosolo mai i le taimi e toe sui ai taimi ia Oketopa. Lona uiga la, e alu atu lava e tau ia Oketopa, ona fesui ai lea, e tai 6 masina ma sui. Lau Afioga i le Fofoga Fetalai, o le faamatalaga lena. O lea la faatoa tatou malamalama lelei i le taimi lenei, o lea lava ua matua pogisa le vaveao, a o lea e i ai le taimi faatulaga. E le aoga ona tatou vave suia taimi leaga o lea e taoto mea o taiala, o mea o faigamalaga. Faigamalaga i vaalele. Leaga e seki le taimi i le 12 masina i le lumanai, e aafia uma ai lava femalagaaiga o vaalele lau Afioga i le Fofoga Fetalai.

O le mea la lena e faatualga lelei le fesui ai lenei, leaga e noatia uma ai lava le tatou taimi i le tulaga faava-o-Malo i le femalagaaiga o vaalele, aemaise foi le fesootaiga ma atunuu i fafo i tatou fesootaiga masani o faiga pisinisi ma tulaga faava-o-Malo.

Lau Afioga i le Fofoga Fetalai, o le faamatalaga lena ina ia malamalama ai tagata ua matua le malamalama a o la e saofafai i totonu o le Kapeneta.

**FOFOGA FETALAI:** Malo faafetai. Ia, se i tulai mai le sui usufono, e matau atu e tele se tapenaga, a ua...

**Afioga Hon FAUMUINA TIATIA FAAOLATANE LIUGA:** Lau Afioga i le Fofoga Fetalai, e pei lava ona ou fai atu o oe o le Toeaina. Ou te iloa pe toe 2 ni aso lea e i ai lau tapenaga lea e i ai. O le aoga lea o mea ia e faamalamalama atili ai e le Afioga i le Palemia po o Afioga foi i Minisita pe a fia saunoa i le tulaga lea. Manaia ia o le faamalamalamaga lea, aua o le isi mea lea o le faasaoina o le eletise, le tulaga o le daylight savings pei lava ona manino i le saunoaga a le Palemia.

O le isi vaega lea na faatino foi e le Malo, o le faavaeina o le tatou faaputugatupe foi lea teu faafaigaluegaina o tupe, le UTOS. O le taua ia o le vaega lea, ona sa i ai lou mafaufau o le domestic arm lea o le stock exchange e amata ai ona aumai ni investors i totonu o le atunuu e create ai le kamupani lea e aumai iinei le maketi foi lea i Hong Kong po o le maketi lea i Singapore e fai ai a tatou... aua o le tele ia o Afioga i alii ma tamaitai sui usufono o lea ou te vaai e fai a latou telefoni o la e foi e faatau ai o latou shares i le stock exchange i Asia.

O le mea la e ala ai ona taua ia te au le mea lea, ou te manatua ai le faavae na faavae ai le finagalo lea o le Kapeneta i le taimi na amata ai ona fuafua o le a faamatuu nisi o Faalapotopotoga Tumaoti a le Malo e fai ma kamupani tumaoti. Afai la o le a faatau kamupani nei, ona faaaoga lea o vaega ia e faatau ai o latou sao po o shares. O le mea manuia lea, ma o le mea foi lena ou te finau ai lava i le mea lea o le fai o le dividend. E ala ona ou naunau e aveese le upu lea o saofaga ia e aumai e le UTOS, e moni lava o lea e faaaoga le management company, a o latou ia o lea e serve ina lena auaunaga i le mamalu o le atunuu. E ala ona taua le vaega lea lau Afioga i le Fofoga Fetalai, si loomatua la e faapau ana koko, si faifaatoaga la e toto ana talo, ia, o le aufaifaiva lea fai mai a ta fai atu i ai e faataugofie i'a ae fai mai e ese foi si a latou galuega, o le auala e faatino ai a latou galuega e le tutusa ma le vaega lea e i luga o le laueleele e feoi, a o latou, ia, e opeopea vae i luga ae alu i lalo le... E pei la o le vaega tonu na lau Afioga i le Fofoga Fetalai, e matua taua ia te au tupe nei e ave i i. Afai ua sili ni tupe, foi i le vaega lea, foi lava i tagata e ona iunite, ae le o le aumai i i, ia na o le \$200,000 pe \$300,000 lea e aumai toe... Lau Afioga i le Fofoga Fetalai, o lou naunautauga lena, afai lava e \$200,000 le tupe lea e totoe ua ova, aumai i i. Ave i tagata le mea lea ae aua le faia le dividend.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui:** Lau Afioga i le Fofoga Fetalai, taatia ia le vaega lea e le oo i ai lou malamalama. O la e lava e faafoe e le Komiti latou, ae sao lelei lau saunoaga i le tulaga foi lele o le ave o seleni ia, e saolele a. Ae o le a faapefea la ona faagaoioi gaoioiga? E tatau foi ona i ai se tupe e faagaoioi ai latou, ae taatia pea le vaega lena leaga e fai si loloto teisi. A tu ae nei le Minisita o Tupe, o, o le matua finauga le mea e fai, ae lelei ona taoto lea vaega, taatia ai pea. E sao lou agaga i le ave uma pei lava o le mea foi lele, aua ne i i ai se tupe e taofi, o a tupe e avatu i le Faletupe lea o Atinae, ave uma e toe lend i tagata ia, tagata ia foi lea e o atu e fia nono. Ae faapefea la le tupe e faagaoioi ai le Faalapotopotoga?

E pei o le tulaga lena o lea e vaai le sui usufono i le itu lena, ae a oo i le faaoioiga o mea uma, e kava uma lava le vaega. O tatou ia o lea tatou te i luga i le policy area, ae a oo loa i le tulaga o le technical side i le faasoaso, ia o mea la na e fai e latou ia ma aumai ai i totonu o le Kapeneta ma fai ai a

tatou faaiuga. E te vaai i itu uma e lua ae te le vaai pitotasi. E taua le point lea e te aumaia, ae tatau foi ona vaai i le itu, e tele lava le mea lea e faasoa i dividend, ae tatau ona i ai se vaega mo le totogiina o i latou, administration, o lea e faafoeina galuega.

**FOFOGA FETALAI:** Malo faafetai. Ia, ua manino le tulaga o le fesoasoani mai foi a le Taitai o le Malo i nisi foi vaega e ao ona faamatuu i ai nisi o seleni faasili mo le faatinoga o le Ofisa ma i latou o lo o galulue e faatino le faamoemoe ma le faagaioiga o lea foi faaputugatupe taua mo le atunuu. E ese le manaia o ia atinae, ma e le uma le fia faalogologo i le tele o atinae sa faapena ona faatino e le Malo. E le o le Minisita sa feagai ma le taimi lea, a o le Malo. Ioe. O le Malo ae le o le Minisita sa feagai ma le taimi lea. O le Malo i ana fuafuaga alualumamao ua mafua ai ona tatou taunuu i le tele o nei atinae ua manuia ai le atunuu. Ia, o mea e ao ona toe faamanatu i le faafofooga mai a Samoa ina ia faapena ona latou silafia foi le anoanoai. Maumau e pe a na i ai se tusi lapoa foi lenei e tusi atoa ai atinae na faatino mai lea taimi i lea taimi e oo mai i le aso, ia ma tufa atu e pei o le tufaina o le Savali foi lea e tufafua i le atunuu ia manino lelei ai le atunuu i atinae eseese sa faatino e le Malo. Ua oo lava i le siiga o le la, o lea ua... Ioe. Ia silasila i le matautia o le mea ua i ai tatou? Ioe. Ia taumafai ia oo i le masina ae sii e tatou le la ae tuu i le isi itu. Ioe. O auala faigofie e aumai e le Atua. Ia o fea la ua i ai nei? Ia o lea ua televave le faatinoga o pisinisi i fefaatauaiga ma atunuu i fafo. E ese le manaia o le meaalofo a le Atua e auala mai ia ai? E auala mai i finagalo o Taitai o le Malo.

Ia, o le a toe maua foi le isi avanoa i le aso a taeao pe a tala soifua mo le saunoaga a le sui usufono e faaauau ai. Ae talu ai ona o lea ua tatou taunuu i siui o galuega o lenei aso e manava ai le Fono Aoa. Ae tatou te le i tolopo mo le aso a taeao, ou te tapa le sui usufono mo Gagaemauga Nu.2 e tulai mai e faaiu le tatou Fonotaga i se tatalo, lau Fetalaiga Honourable Faasootauloa Pati.

*Na tolopo Tualumaga a le Fono Aoa Faitulafono i le itula e 1:04 i le afiafi seia aulia le Aso Tofi, 11 Fepuari i le itula e 9:00 i le taeao.*